

于山奏牘

1885



1621111

序

奉 皇 朝 聖 訓 至 金 刻



長 樂 縣 志 卷 之 四 序

今上之二十年

庚子夏四月



公 著

王師克滇所向底定神武旣昭罪人斯

得薄海內外悉主悉臣罔不賓服

上大嘉悅益精惟治理以

大中丞夫子于公之治

畿輔為天下最

特晉位大司馬總制兩江以風有位蓋
上知公自令牧二千石及監司藩臬以迄
開府上谷歷閩楚蜀粵垂二十年清
操偉畧鴻文鉅績久而彌厲故兩歲
之中節鉞再加一時

眷遇罕有其匹明年夏四月公請假在里
祭葬畢卽單騎至金陵惟攜圖書數

卷直馳入署五月素自楚趨侍恭覲
御書賜公詩卷兼聞

駕幸雄縣

召見幄殿溫語移時且其舉皆尚卷陳其
詢公曩撫勦東山時事甚悉益嘆
君臣相得今古維難而公獨遭際
聖明若此不有編述懼不足以傳久遠因

發所攜圖書得公自令羅城以來諸
奏牘詩文稿踈請於公以爲古人著
書立言非徒誇示文字良欲開導後
學使知所取法無其事者尙欲有其
言况公之著作皆因時立議見諸行
事淡切著明小之治安一方大者動
關

國計非鑿空結想借物託興之儔且公
三舉卓異屢平劇寇

天子知之已十數年故復於雄縣
親垂顧問倘一旦

詔公條上行事用備採覽而編簡無稽其
何以對公許諾乃次第諸稿片楮隻
字皆公親筆細書歲久黴蠹霑蝕半

就脫落彙其可識者爲若干卷伏讀
十許日曰於戲盛哉今而方知無意
於功者始能成天下之大功不遺一
事者始能集天下之大事本內聖外
王之學以行其致君澤民之志其在
斯夫其在斯夫方公初仕粵西瘴癘
所侵異類與居凡七年矣北人宦此

者百不一歸而公處之泰然畧不爲
動卒之猺獞革心民孚盜戢其規畫
條議至今猶用之不盡抑何偉也及
由蜀入楚遍歷艱險數定大亂使內
地悉平

王師得一意南征無後顧之慮迄今讀
與中丞張公徃復諸議真死而後

月四
生危而後存其難更有百倍于往日
者當東山逆賊首倡江右吳豫轉相
煽熾使蘄黃不守則吭扼喉噎荆武
非我有矣公獨與張公定策率門下
十餘人督鄉勇數千直搗賊巢身自
陷堅親冒矢石一敗之黃土坳一敗
之紙棚河旬月間一撫再勦諸逆授

首而吳豫江右間聞風潰散南北之
路始通方是時外誅巨寇內辦軍需
旣飭屬僚復撫百姓羽檄交馳人馬
擐甲凡所設施皆手自裁咨于蒼皇
中示閒整於擾攘中恤民力罔不纖
悉曲當洞中機宜此又素所親炙不
假披閱始知者至若出八閩于湯火

之餘調劑軍民各安厥所贖還難民
動以千百每一書上

王公大人皆虛心聽受撫綏上谷屢建
讜言爲民請命

天子知公直皆

特旨報可以故得蘇解困痼全活死徙無
算古人得一節足以傳之無窮者公

則萃於一身無往不備又更僕難悉
者矣論者謂公以外臣重徼

陛見

上親灑宸翰兼賜白金良馬乳酒銀貂麇
兔魚鳧等物

恩禮疊加人臣之榮至此已極不知公之
得此皆出意外當其入粵初不自意

能至蜀也及乎仕楚更不意能至閩
也而又安望開府出已越不狀公
畿輔總制兩江哉惟出萬死不一生之
計祇知

君父深恩在所必報其身家性命已久置
度外故凡有建白輒掀髯而談畧無
嘆喑使稍有顧戀其伸紙著筆雖曲

極組織其於

國家事終屬隔鞞搔癢又何能功成事
集如此其烈耶是故爲人臣而知讀
是書其常也必廉其變也必勇爲人
子而知讀是書其養也必力其哀也
必毀以此治兵必無覆敗之虞以此
臨民必免貪戾之禍以之爲國則達

經權以之居家則敦孝悌於戲公仕
且二十年危行特立觸忌諱不少矣
所賴

聖天子及當代王公大人知之於今千百
世忠臣孝子志士仁人奉之於後今
雖華袞被躬騶戟衛道退處一室鷄
鳴而起鐘定而臥惡衣麤食有寒士

之所難堪而文章經濟顧廣大精切
若此又孰得孰失也公嘗謂所受知
諸大人君子皆及身顯庸無復欠缺
獨中丞張公鞠躬報

國盡瘁以歿今滇黔蕩平而身不及見
每展對手書輒愴然出涕不知此書
傳則張公之功德自與之俱傳卽當

代諸大人君子亦無不與之俱傳於
以副

聖天子精惟治理之盛心使士大夫服官
攷業者咸有所矜式更使天下後世
知凡欲成大功集大事者必於此不
於彼其爲禪益豈淺鮮哉公茲甫蒞
兩江未期月綱紀整飭俗易風移每

有示諭閭里小民爭手錄口誦旬日
成帙由此平章天下高文典冊方昌
未已奏之廊廟鼓吹休明將盈車累
棟有一書再書不勝書而已者更請
以俟諸異日云

康熙二十有二年歲次癸亥春王正月
上元楚黃亭州門下士李中素拜撰



卷之十一 廣東通志 卷之十一 廣東通志

于山奏牘目次

卷之一

初蒞羅城自記

粵西引鹽議

粵西地方事宜議

條陳粵西事宜

與友人荆雪濤書

合州採木報文

附張撫臺復書

請復祀典詳

請正朝儀詳

規畫銅梁條議

附張撫臺復書

請留合州防兵詳

請復岳站詳

收復蒲圻報文

咸蒲浮橋報文

二道

籌畫蒲圻防守報文

籌各屬情形報文

卷之二

請武昌屬邑緩徵詳

辭武昌任詳

請黃州屬邑蠲災文

守黃郡上撫臺

附張撫臺復書

籌緝逋寇

附張撫臺復書

籌捕東山逆寇

附張撫臺復書

籌畫楚疆預備

內艱告歸上撫臺

附張撫臺復書

請免葬運詳

請免募鎗手上撫臺

附張撫臺復書

募獵戶上撫臺

附張撫臺復書

請改麻城南折上撫臺

諫止採買上糧道

捕盜巴河報撫臺

二通附撫臺書

籌荆州夫役

二通附撫臺書

請捐輸免運夫詳

籌報災

附張撫臺書

聞西事上撫臺

復撫臺募兵夫

附來書

募鎗手報撫臺

地方妖異報撫臺

禁健訟條議

廢基淤地認糧議

附撫臺書

長沙報捷賀撫臺

附來書

重選鄉約示

禁士克里役示

勸賑論帖

申明六訓示

籌黃安饑民示

團練保甲示

慰諭急公示

禁諭荒民示

招反側充伍示

慰諭黃安饑民示

委黃安士民堵禦檄

慰撫陽邏士民示檄二道

禁夜行示

卷之三

初撫東山檄

諭歸農示

撫東山詳

安慰各堡示

撫東山報道文

撫東山報撫文

報撫臺安撫東山二道

諭東山士民示附張撫臺書

東山撫竣報各臺附撫臺書

撫後諭東山示

撫竣慰士民示附撫臺書

報旱呈撫臺

祈雨示附撫臺書

安慰士民示附撫臺書

諭各屬隣境示附撫臺書

撫事報道文附撫臺書

委護程宦牌附撫臺書

行保甲示

招撫事竣詳文附撫臺書

善後事宜上撫臺附撫臺復書

禁止嚇詐示附撫臺書

清理保甲示附撫臺書

慰西北鄉示

再飭保甲示

申飭區堡示

再諭東山士民示

給鄒家河示

獎諭士民示

撫竣回省遣牌附撫臺書

勸諭唐殿示

黃郡開印申飭示

卷之四

勦紙棚河逆賊委牌

曉諭各屬示

宣慰招撫諸賊示

布告紙棚河大捷示

委犒鄉勇牌

曉諭止殺示

勸諭餘賊投誠示

申覆張撫臺

撤鄉勇凱旋檄

禁止侵占示

申解賊首報撫臺

禁止詐害示

敘功詳文

進剿東山報撫臺三道附撫臺書

進剿東山詳各憲

申張撫臺文

剿何士榮各檄示十道

申張撫臺

申報兩臺文

諭黃土坳示

上張撫臺報捷二道

上張撫臺

屯呂王城諭示

次白水阪上撫臺附撫臺書

次定慧寺報撫臺

移黨伊二叅將

申報撫臺文

募擒賊首示二道

擒獲眾逆報撫臺附撫臺書

禁擄掠株連示二道附撫臺書

上撫臺乞休致附撫臺書

拿李公茂示

敘從征紳士功績附撫臺書

敘功詳文附撫臺書

嚴禁嚇詐示二道

黃協弁兵爭功看詳

東山平定勒石銘

復張撫臺附撫臺書

復張撫臺設水師議

上撫臺論斬黃守禦附撫臺書

上撫臺論九江事宜附撫臺書

上撫臺論兵事附撫臺書

申撫臺請增防兵附撫臺書

報撫臺獲陽邏偽劄附撫臺書

招安六安州麻埠示

與吳道臺論東征方畧

附張撫臺來書二通

卷之五

慰蔡制臺丁艱

候蔡制臺

上蔡制臺用兵方畧

上蔡制臺南征方畧

賀蔡制臺

上蔡制臺乞歸守制

復蔡制臺二通附蔡制臺書

上制臺請留斬將附制臺復書

與兩粵金制臺書

上勒部堂書

初至黃郡與友人書

規復蒲圻與王憲副書

留別蒲圻紳士書

與鄭學憲書

與屬令書

與麻城諸生書

與同僚書

謝徐守憲書

與王協鎮書

與各屬邑令書

新正候張撫臺

報擒莫偽道上撫臺

陞閩臬上張撫臺

上徐藩臺書

為藩憲上張撫臺

上康親王罷斲夫啓

二通

上吳撫臺閩疆事宜

候吳撫臺

二通

上姚制臺和衷書

上姚制臺議捐米書

卷之六

初任直撫請

陛見疏

報災請蠲錢糧疏

請增驛站工料疏

請蠲宜屬衝壓地糧疏

請禁訂告疏

特參州牧黨盜疏

救饑緩徵出糶疏

請急賑口北饑民疏

賜書經解義謝疏

再請 陛見疏

陛見蒙

賜謝

恩疏

題報蠲賑宜屬疏

再為驛站請增工料疏

真屬被災請停徵疏

卷之七

請免河間民買房地疏

請寬盜案處分疏

請緩徵災邑房課疏

報賑宜屬饑民疏

賑濟事竣回署疏

雄縣蒙

賜謝

恩疏

請更宜屬文武儀注疏

請假歸墓疏

請全蠲災邑錢糧疏

假歸請護印疏

請帶筆貼式疏

弭盜條約

卷之八詩

戊申除夕入彭水採木宿神祠側作

濮湖夜月

東津漁火

魚城煙雨

金沙落雁

老女吟

晚菊四首

粵西九日

偶吟

寫夢

中秋值雨有感二首

秋吟二首

無酒

春雨

春暮

客訪溪

春月

蜀中山行

自吟

鷄冠花

成都三首

蜀道二首

霧

長安邸中冬日

夢境二首

戊午監試楚闈作

偶書

冬至渡淮

過虞姬墓二首

銅雀臺

中途遇雪

代兄憶弟

自嘆

賀壽二首

贈屬邑

勸民

讀聘君歌

紀行

除夕四首

夢餐優曇花作

庚申除夕上谷署中作

辛酉上元上谷祈雨作

壬戌秋九金陵署夢中作

詩餘

憶王孫

如夢令 二闕

滿庭芳

百字令

風流子

西江月 二闕

制義

澆耕易耨壯者以暇日修其孝弟忠信

于山奏牘目次 終

于山奏牘卷之一

晉西河于成龍北溟父著

初蒞廣西柳州府羅城縣自記

粵地僻處南荒與交趾接壤距中國萬里越洞庭之險涉瘴癘之危官茲土者岌岌乎殆哉當事者慰之曰粵地雖苦法網稍寬臥治三十月以爲梯榮藉而事竟有大謬不然者棄墳墓別妻子揮淚長途歷盡艱辛及抵任水土不調疾病日侵僕從死亡相繼言之者傷心聞之者酸鼻瘠骨山立催科勞心親較簿書日無寧晷院司道府督責不

少貸服中土之官者堂宇巍峩吏胥雲集所求無不如意
凡有呵譴自取其殃夫復誰怨若夫粵西地瘠民貧田土
荒蕪衙舍傾倒無吏無役其何以治食監門之食衣皂隸
之衣強勉從事初不知有爲官之榮也苦至此極矣而額
外之誅求意外之罪謫無因而繩其後所謂法網稍寬者
何在也嗚呼天下最苦者無如粵西粵西最苦者無如柳
郡降罰接踵恐吏不安而百姓愈危地方滋擾其關係匪
淺鮮也當事者或可少寬法網以亟救其後云

粵西引鹽利弊議

查看得柳屬地瘠民貧兼以猺獞雜處從無引鹽舊例因
粵東以積引壅滯貽害粵西郡縣而銷引之議自康熙元
年始柳屬各陳艱苦以引鹽決不能銷考成斷不能完泣
訴詳請免銷文案如山附卷可查撫臺憐各郡詳免痛切
題請免銷部議未允事出兩難一面催立埠招商時商
人因引目數多無人敢於承應又行文僉派里商赴東領
運卽催開未完鹽引州縣職名吏民驚惶無措幸撫臺淡
知吏民病苦補牘再陳區畫戶口食鹽之法極力調停部

議始允而鹽引幸減三分之二矣自此鹽課已定有司雖
愁苦中積亦無可奈何有招商立埠者有設法官運者有
僻處山中招商不應請命於上司代爲招商運銷者咸屬
急迫無聊之計幸數年以來考成俱完且有溢額之引原
其行鹽之初何嘗計及此也今有司之考成雖完而民窮
愈不可支是一法立而一弊生又不可不蚤爲之變計成
龍奉條議之文確知民苦不敢坐視不言其一官運之宜
嚴禁也當行鹽之始民苦無素封之家吏苦無點金之術
不得不賒借於有鹽之處以救考成之急鹽主因無現價

倍昂其值鹽之來也旣貴則有司之發也自不得賤且在
官之僕役明知鹽價出之百姓領運盤費誰肯較銖計兩
以爲官民計者鹽價之貴職此故也至於發鹽之權自上
操之有招商領運鹽包數多而頻發者有不係招商假名
色而予以必發者上之發於州縣也無已則州縣之發於
民也亦無已有司明知民苦卽引目已完而亦不敢不領
爲無可如何之勢領之必速發發之必速催鹽價雖貴而
民不敢爭催納雖急而民不敢議引價雖銷而民不敢言
日復一日而民病已入膏肓遲之又久不惟累正賦而且

恐無民之可累矣官與民皆沉淪鹽引之中而莫之救其
一埠商之宜革也官鹽係梧州賒來之物引稅水脚俱在
其中有司止幸完其考成而不敢復議貴賤爲窮逼所使
而然也若埠商運自廣東鹽價可屈指而計且競刀錐之
利誰肯浪費一二及至地方揆知官鹽之價若干亦照樣
行之利踰本數倍乃無良心之極也卽有輕利之商欲減
其鹽價而又恐官鹽不行而獲戾焉是官不樂商鹽之賤
而致壅積商更樂於官鹽之貴而獲厚利兩相騰湧民無
賤鹽可食而民愈窮更有可異者旣名埠商其發賣自應

聽乎其便無如其發鹽也必求之有司而其收價也三五
成群挨門逐戶而遍索焉埠商之病民於斯爲甚欲去官
運埠商二弊莫若曉諭流商從便發賣渠較鹽本幾何鹽
利幾何斷不至湧貴數倍而民亦敢從而爭之議之况前
商之鹽貴而後商繼之勢不得不減價以求速售如是而
隨時貴賤非同官勢強壓而鹽可無一定之貴價民亦得
量其有無因其緩急任其多寡隨便而公易之而民可無
不得不領不敢不領之苦民窮稍甦流商喜於疏銷有利
而來之必廣窮民一旦得食賤鹽而銷之必多則引額較

前更踰有司亦不至有考成之慮然尤宜爲流商計從粵東領鹽梧州交引換票其查核已嚴矣後抵柳府交梧州之票另換柳府之牌任意於各屬交易州縣不必畫疆界分彼此以免煩瑣流商之害而盤詰私鹽諸務亦可中止民生獲被寬大之情惟恐流商罕至而提標數萬兵口一年食鹽無算馬平鹽包不及二百其餘之引或可以備不足是又意外之一策也若王公將軍有鹽亦與流商等任其銷賣不必經有司之手則流商之鹽從何而壅食鹽之民從何而苦也

對粵西金撫臺問地方事宜議

問綠林草竊如何消弭逋誅逆獍如何擒緝山川地理之險要如何屯戍設防狎犴狼獾之驕悍如何撫綏馴制倒廢驛站如何興復如初森嚴欽限如何依期完結土司漢彝交錯之地如何立法使邊陲藩籬鞏固相安錢糧關稅納污之藪如何釐剔使陋規火耗悉除殆盡何以清刑獄使民無幽繫何以懲刁頑使民不健訟何以招流移使開墾秦蕪何以懲貪酷使澄清仕途何以察芟衙蠹何以積儲備荒

議得救寧地方之要莫若安民而安民之法必以肅清吏治爲先務吏得其人而潔已愛民則弭盜固圍省刑息訟與利剔弊諸務畢舉雖在荒徼可漸次化理矣成龍書生寡昧荒裔下吏不識時務仰承憲問憂時遠慮上以爲國下以爲民敢不悉陳芻蕘以佐未議今天下車書一統中外臣服粵西遠在南荒仗威底定巨寇無遺而未雨之綢繆時僅憲慮夫地方何盜盜卽民也民雖無知决不樂於爲盜有迫之而爲盜者責在有司清淨寡慾先之以德教以端風俗繼之以保甲以防不虞勿戕民命勿剝民膚俾各安室家各戀妻子此弭草竊之未議也粵西猺獞種類不一素號兇悍以殺戮爲生兼之十數年來地方無主強兼弱衆暴寡無一淨地 天戈一指么魔屏跡彼已悉畏其威然未盡懷其德若疎一面之網多方招撫開誠布公消疑釋嫌逆獞雖愚亦必樂生惡死悉歸王化不煩弓矢而土宇寧謐此安逆獞之未議也山川地理或水或陸未歷其地難以懸擬大約粵西地險獞悍屯戍之兵不可不設而統兵之法不可不嚴兵以衛民亦有禍民者兵以防奸亦有作奸者屯戍設防寧簡無濫矜犴狼獞不事詩書

不諳禮法驕悍固其素習責在有司暫羈縻之漸教育之
寬舒其手足約束其心思撫綏馴制寧猛無寬若夫驛站
最爲民苦當湯火初出或可徐議興復然煌煌 功令火
牌勘合之外嚴禁私役需索等弊四季循環立簿查核有
司實心奉行勿加譴責則民吏不受害而興復如初亦不
難矣 欽限事件最爲森嚴有司敢不殫竭心力勉副
功令然粵西與腹裏不同猺獞不習書數吏役乏人一二
經承兼理六房事繁人寡簿書堆案有司攢眉晝夜不停
而案牘彌積如造由單造奏銷造會計造徵解冊籍繁多

毫釐不敢苟簡此係每年一定之成例又加以清丈田畝
編審戶口催造開墾無事不重且大以一二書役朝夕拮
据心血嘔盡一不合式查駁再造而限期已逾此事之無
可如何者也有粵東善書算者投充彼明知工食盡裁
必求里甲私幫赫赫 功令誰敢自罹法網是僉役土著
苦無其人召募流役苦無其資書算者寡事必遲延則依
期完結之法不能自爲之解矣至於土司古昔設立土官
撫其種類誠以人地相宜性情相近以彞治彞縻之以爵
祿而爲 朝廷用故無反側之憂今日彞漢錯處殘忍多

乖皆因土官左右無正人教導無良法以至於此若諭以
輔導擇人循法奉公使彼內地和平輸納其貢稅而無復
苛求自可相安於無事錢糧關稅國課攸關然今日粵西
之百姓當兵火二十年財力俱竭目擊荒烟茅籬遍皆鳩
形鵠面穀賤金貴幸而正賦蚤完已出望外况鹽引加派
束手待斃萬無疏銷之術 國法難逃而陋規火耗雖甚
不肖者或未必能行之茲土也刑獄者民命所係寧失出
毋失入而好生之德自洽也詞訟者風俗所關禁止教唆
嚴絕 赦前先審察原告之詞色勿爲濫准而刁頑之風

可息也殺戮之後人民逃散田地荒蕪但使遵行三年起
科之實政吏靜民安流移可不招而自來也烟火輳集藁
蕪可漸次而開闢也貪酷者害民害政之本然蠻烟瘴雨
地瘠民貧性命之念重富貴之心冷加以憲臺之嚴肅有
司雖不肖或亦望風而畏罪之不暇殃民者莫若衙蠹芟
之毋使濫充一歲必更察之毋使倖生而置辟不貸救荒
者莫若積儲常平一倉萬古良法春發秋收與民便宜而
緩急有濟他如土物之採買里甲之苛派新役之幫貼當
此邊荒初甦之域未必如腹裏之事事可議也

酒者害矣善為之

小飲火熱

康熙八年離羅城赴合州任抵桂林謁辭金撫臺條

陳粵西事宜

一塘兵之騷擾未盡除也奉文嚴飭遞送公文文設舖兵武設塘兵兩不相涉遵行久有定例無如有司與防弁或情面相徇或私弊牽制縱放塘兵居住民村日供柴水米食如故民不聊生惟在嚴察一見年之答應未盡革也奉文嚴飭見年止許催辦錢糧不許答應有司衙內供給上司差役飯食及過往仕客下程酒席無如積習難破肆行無忌者夫亦不少且無恥輩藉口某縣有供應恐嚇里民

逐逐欲行不思洗滌惟在嚴察一知府之權太重也往例州縣有道府廳爲之伺察三分其權而情難私飾勢難獨斷公道不能盡泯今道廳奉裁而有司之賢否藩臬耳目稍遠惟知府爲最近若府得其人則官方自清民生自遂地方自安或不得其人則是非憑其喜怒賢否任其高下而有司畏知府更甚於畏院司在下曲意爲阿從在上極力爲徇庇從此效尤成風而民命邊境關係不淺惟在裁酌一部頒法馬之宜公用也粵西地瘠民貧錢糧不容拖欠正宜恤民財以完公事若徒知刻剝則民多一分之私

費便缺 朝廷一分之正項以至嚴刑追比差役拷索民號泣無訴必倍貸以緩目前迨至秋成雖豐田中之禾先歸債主一遇歲歉賣兒鬻女奔走流離是當亟加憫念嚴革收銀用戲以除暗加明加之害凡收條編有司宜親坐堂上將天平法馬置之座右不得拘定某盤放銀某盤下馬聽從百姓充納有司卽發印票不得假手書役一力掌定民不敢言如有用戲收銀及書役覓平者許百姓赴告一納銀納米之宜速收糧票糧單之宜速發也近奉新例四月九月催徵夫四月適當耕耘之候九月又在收穫之

時農工正殷而催科值逼民之赴納也已非得已又從而
措延之夫復何望且有司所司何事若百姓納銀米而不
卽上堂躬收是怠惰也若百姓群集不能隨到隨收卽時
發放以至百姓隔宿守候則有司之才不才亦大可見矣
是在嚴察一四月九月之新例宜通融也粵西與腹裏不
同夏禾最寡而秋稻爲多卽秋稻亦有二種有七八月收
者有九十月收者是四月正耘九月正收之候也於此而
催科太逼則公私不勝其擾矣或稍爲通融聽從民便自
二月起至四月止有願輸納者收之願全完者獎之何必

拘拘定以四月爲限也或孤單貧弱或水火災喪一時力
不能辨者許具呈寬限秋收上納又何必於四月納半九
月納半之拘拘也窮者不得與富者較有故者不得與無
故者較量人情之緩急而權衡之期於完正賦而止卽有
艱難困苦者量免一二而在官俸食豈不可相爲開除奚
若與熒熒赤子較輜量銖而算之無遺力也又恐不肖藉
名豁免而開侵欺工食之弊是必將豁免者大張榜示俾
民役咸知各抄一張存照以杜弊端如此新例雖定而思
行於例之中是催科中之撫字也若夫未及四月而催徵

全完是必急於火耗已經徵完而未行起解是必陰爲那
移種種弊端難逃洞察一見年之亟宜閔恤也粵西見年
名色與腹裏里長排年爲一例係十年輪任正務若不加
撫恤任意刻求勢必家破人亡於一年之中卽數十年培
養之不能復其元氣夫旣革其供應矣而用其力以催辦
錢糧是正務也然見年亦有田地若終日奔走挨門逐戶
而催之則自己之田禾荒不能顧雖未竭其財而亦已蹶
其生矣當開徵之候有司出示曉諭俾百姓隨便上納如
輸納不前令見年催冬頭冬頭催花戶可不勞而坐致也

至於朔望之點卯歲時之謁見日用之伺候當此邊荒極
苦之地徭徭畏疑之衆似可盡革而期於相安是在裁酌
一雜派之不可包於官由單之亟宜發於民也夫雜派之
禁奉

旨嚴飭不啻再四然亦有確不可少者每歲之中造由單紙
張工墨有派在縣造實徵紙張工墨有派藥材本色額銀
不足有派表箋包袱額銀不足有派春秋二祭禮不敢儉
起解編銀水脚盤費有派兩次奏銷水脚費用有派是皆
一定之例萬不能除但當堂與民公議期於足用眼同交

出其派單有司硃墨點定散於見年存照總有不肖料不
敢將多派硃單留之百姓爲話柄也至於意外之事如往
年幫解雲貴之餉費有派幫各道之進表有派幫潯州之
水脚有派凡如此類咸由上派定原有定數應將原牌付
與百姓從公議派完解庶有司無不可告語百姓之事百
姓亦無疑畏有司之心上下相知而緩急可以相濟若夫
愚弄徭徭欺其無知藉口派項之多在官一力包管初則
猶相照顧終則包外加派民苦不堪而逃亡相繼是在亟
爲勸諭禁止也正賦雜項界限不明總由不發由單之過

徭徭雖不識字彼亦知遇人而過問焉不發由單則原熟
新墾混淆無所查明雜派得由而入之矣然 功令日嚴
諱過愈巧印結甘結徒事紛煩若出其不意稽查一二鄉
民問其有由單否而官吏無所施其巧也卽如收銀大流
水簿俱係奏銷時打點停當無關實事止將納銀發票與
由單合否而官吏又何所肆其貪也一有司之廉恥宜養
百姓之泣訴宜詳也夫官之於民猶父之於子父不慈則
子不孝官不清則民不良况邊徼之民雖刁與腹裏大異
腹裏有勢宦挾制噩衿把持光棍肆惡捕風捉影若夫蠢

爾猺獍則不然不諳官語不識文字惟聽外江流棍唆哄告狀誑騙使用及至提審茫無一應此粵西開闢初年之情形也數年以來百姓告官吏者不一非盡流棍之唆哄實有逼於不得已者夫民之告官吏豈盡是子虛豈盡是刁詐且有司之於民宜化刁爲良上下親睦至於致民控訴全無體面亟宜引罪自悔聽上處分辭職離任庶不致於官民構訟以傷體統若反復爭辨以祈免罪加民以刁寧不自愧縱使辨明無辜復何面目覩居民上乎倘民含冤不能剖訴復增一仇敵愈使民重足而立也如立意與

民洗冤此風一倡始也訴之出於無奈猶知犯上之科究也稍拂其意而肆行無忌恐開刁詐之漸是在憲臺默挽風化以釀和平之福也如有告官吏等事留中而不必明行按事而漸除之以去地方之蠹以伸百姓之冤則官吏知警不至與民廷辯庶公法行而廉恥亦全百姓知狀之未有准行也必俯首歸家不敢居告官之名及官掛彈章百姓群頌爲上之明而不自以爲得意是官之罪狀取之群議而無隱匿叅核之權蒞之於上而不顯恃乎告訐如此則民情上達而民風或可幾乎淳良也且以省案牘之

煩而上下蒙清靜之休矣一粵西之邊防宜加誌也邇來
交南內爭附於中國以爲聲援然弱則帖息聽命強則跳
梁抗尊勢所不免彼目覩兵馬雲集敢不惟命是從然三
豎之勢不相下兵馬一退緩必相謀彼內豈無智者陽爲
順從陰爲修備事未可知况數年以來土司之官亦殫力
矣改土爲流之民亦未服心矣且猺獞嗜殺爲性反覆無
常卽有司恩養如赤子而終不能必其革心也是可危也
又在憲臺未雨之綢繆焉

與友人荆雪濤書

廣西柳州府羅城縣偏處山隅東北界連湖南道通一帶
西北界連貴州清平一帶其餘土司環繞山如劔排水如
湯沸蠻烟瘴雨北人居此生還者什不一二土民有猺獞
矜狼之種帶刀攜鎗其性好殺父子兄弟反目操戈恬不
知怪順治十六年冬初入版籍成龍於十八年到任掣簽
後親者不以爲親友者不以爲友行李蕭條自覺面目可
憎賒腳錢寄口食行至清源做同年王諱吉人初爲蕭山
尹繼轉蘇丞時讀禮家居慷慨仗義反覆開明粵西非吉

祥之地素知成龍家食尙可自給力勸勿任以繳憑爲高
見成龍時年四十五英氣有餘私心自揣讀書一場曾知
見利勿趨見害勿避古人義不辭難之說何爲也俛首不
答王兄默知其意亦不復阻灑淚而別五月初三日至家
別繼母妻兒資斧艱難典田賣屋設法止有百金攜蒼頭
五人勇壯可伴臨行敝族相餞歡飲至夜扶醉就枕而天
已明矣古云壯士非無淚不灑別離間此不情語也天明
舉家拜別大兒廷翼入庠已久猶如處子將祖遺田產文
券開明交付外止云我做官不管你你治家莫想我二語

甫出戶庭而哭聲已達外矣拜別祠堂不覺腸斷門裏門
外相聚而泣不復回顧攬轡登程此時之壯氣真可吞猺
獠餐烟瘴而不爲之少屈迨行至湖南冷水灘一病顛連
未免英雄氣短勉強扶病陸行至桂林謁見上臺皆知羸
體伶仃詢及病狀咋舌驚訝惟勸以延醫調治勿亟赴任
抱疴之人至是膽落往日豪氣從何得來病幾危以苦孽
未盡不速死扶病至柳州稍愈尙不知羅城在何方也羅
城與融縣沙鞏連界行至沙鞏遇許鄉老仔細盤問方知
對山卽爲羅境登山一望蒿草瀰目無人行徑周山遍似

營陣哀哉此何地也胡爲乎來哉悔無及矣從此想敝同年之忠告不置也癡人作夢以爲邊地如此漸入腹裏或不然可憐黃茅直抵城下八月二十日入縣中一如郭外居民六家茅草數椽寄居關夫子廟安床於周倉背後夜不瞑日痛如刀割黎明上任無大門無儀門兩墀茅草一如荒郊中堂草屋三間東邊隔爲賓館西邊隔爲書辨房中間開一門入爲內宅茅屋三間四圍俱無墻壁哀哉此一活地獄也胡爲乎來哉鬱從中來病不自持一臥月餘從僕環嚮而泣無一生氣張目一視各不相顧無如罪孽

未盡死而不死乞歸無路扶病理事立意修善以回天意凡有陋弊清查詳革可憾已命不殞禍及從僕黃瘦似壁畫陰鬼相對而泣莫能相救無何而一僕喪命餘僕驚惶不知所似至康熙元年正月群謀爲歸計成龍自忖一官落魄復何憾諸僕無罪何苦累之叮嚀各自逃生內有一僕蘇朝卿仗義大言曰若今生當死於此回去亦不得活棄主流落他鄉要他們何用哀哉幸有此也其餘掉頭不顧當時通詳邊荒久反之地一官一僕難以理事乞賜生歸當事者置之一晒而已本年逃僕歸家大兒悲念天

涯萬里一主一僕何以安身續覓四僕來任而三僕皆登
鬼錄止存一僕在衙晝夜號跳一如風魔事處兩難一人
難以遠行欲將存僕伴歸隻身更苦無如存僕亦有思歸
之念聽其浩然長往萬里惟餘一身生死莫能自主夜枕
刀一口床頭貯鎗二桿爲護身符然思爲民興利除害囊
無一物猺獍雖頑想無可取之貨亦無可殺之仇帖然相
安事到萬不得已之時只得勉強做來申明保甲不許帶
刀攜鎗咸遵無違間有截路傷命無踪盜情務期跟尋緝
獲隱昧事情盡心推敲必得真實立刻誅戮懸首郊野漸

次心服地方寧靜而上臺採訪真確於是有大事殺了解
省小事卽行處決之通行也境內雖平憾與柳城西鄉爲
隣此地祖孫父子長於爲賊擾害無已申明當事者以盜
案爲艱置之高閣成龍思漸不可長身爲父母而可使子
弟遭殃乎約會鄉民練兵親督勦殺以對命爲主殺牛盟
誓齊心攻擊先發牌修路刻日進勦此未奉上命而專征
自揣功成亦在不赦之條但奮不顧身爲民而死勝於瘴
病而死也主意已定決不可回而渠魁俛首乞恩講和搶
擄男女牛隻盡行退回仍約每年十月犒賞牛隻花酒一

次取各地方甘結存案敢有侵我境界者不報上司竟行
勦滅第獮人不怕殺號令一以剝皮爲主而隣盜漸息至
是上臺採訪更確反厭各州縣之請兵不已報盜不休之
爲多事也嗣後官民親睦或三日或六日環集問安如家
人父子言及家信杳絕悲痛如切已膚土謠武陽崗三年
必反亂一場任至三年寢食爲之不安賴人心旣和謠言
不足信也又云三年一小勦五年一大勦及至五年又當
愁苦賴官民相愛謠言不足憑也時法令太嚴有犯必殺
情誼爲重婚娶喪祭民間之禮一行無不達之隱羅城之

治如斯而已康熙二年藩憲金公特取入簾諸官損從盛
飾成龍止帶皮套一件共相驚訝留意相難時藩憲峻厲
異常輒欲詬詈屬官成龍心不平居闈中屢以抗直不少
挫辱從此見重朝夕必求坐談盛典不可悉數嗣陞本省
巡撫卽以條對下詢盡心敷陳民間利病俱係入告重事
納言如流事事 題疏而主文者辭不達意

旨允者什之七八康熙六年成龍以邊俸逾期八月陞四川
合州時報未到金撫臺面諭兩司如不舉羅城令本院當
特疏薦舉矣兩司唯唯從命而以卓異聞撫臺又恐地方

委用不得人反滋擾害端疏新舊交代哀哉數年來一舉
一動原非爲功名富貴計止欲生歸故里日食二餐或日
食一餐讀書堂上坐墀堂上毛頭赤脚無復窳長體統夜
晚酒一壺值錢四文並無小菜亦不用箸快讀唐詩寫俚
語痛哭流涕並不知盃內之爲酒爲淚也間嘗祝告城隍
謂我無虧心事一點當令我及早還鄉幸得保出性命回
想同寅諸公死亡無一得脫鬼神無爽能不寒心赴蜀之
日別金撫臺蒙諭云我薦舉一場指望行取知道你窮苦
我爲你湊下盤費誰知你先陞了此亦是你的命但兩司
因認不得你不肯薦舉你本院發怒方纔舉來誰想督臺
將你考語淡薄自甘四字圈了立意粵西單舉薦你一個
亦是公道難泯處今你往四川又是苦了照羅城縣做去
萬不可壞我名聲我與書二封一與總督一與撫臺因此
益勵前操至死不變此數年之大槩也偶書呈以發知己
萬里一笑

合州採伐楠木報張撫臺

為請

旨事康熙七年十一月二十五日奉巡撫四川都察院張憲

牌案照查楠一事屢奉嚴

旨隨卽通行各屬遍查具報去後事關 欽工本院不得不

親往誌載產楠之馬湖永遵一帶躬率彼地各官兵役直

抵溪山遠箐確查大材楠木以資 國用除具疏 題明

擇吉起馬外合先行委為此仰該州官吏查照牌內事理

卽束裝星馳前往彭水武隆二縣會同該縣文武各官率

領兵役鄉導確查搖櫓白馬江口及近西陽一帶山箐併南川縣金佛山馬嘴等箐堪充樑棟大材楠木逐一開列圍圓丈尺計其臨江道里遠近馳赴遵桐回報本院以憑親臨彼地覆行查看酌估需用錢糧題報施行該州查明一處卽詳悉具稟封入檄筒飛遞駐節處所投閱仍減從兼程前去不許多帶人役滋擾地方若奉行不善有悞欽工法在必行非比他事可恕如著勤勞本院定當特薦仍先將起程日期報明等因成龍捧讀憲諭減從稟遵帶書吏二名陳鼎李文華快皂二名王印清王應鳳門子

一名朱紫貴合併報明外第今歲災青迭見天變異常邸報不絕正恐懼修省之日夫何恬不知怪大興土木勞民傷財驚擾遐方廟堂之上曾無一朝陽鳴鳳此成龍之所大懼也蜀川素產楠木列朝已有成案第今日之蜀川非昔時全盛可比田地荒蕪烟火絕滅賦役戶口載在由單歷歷可數卽有一二孑遺驚魂未定向望安輯撫育之不遑忽遭此大役誰爲採辦誰爲牽運哀此殘疆勢必官與民偕斃從此流民裹足居民驚散可惜蜀川財賦之鄉終爲空虛之地此成龍拊心太息不禁痛哭流涕者也成

龍職屬下吏凜承

皇上嚴諭踧踏無地星夜就道躬入溪箐確查無遺仰副憲命然不覺有切身之慮焉成龍由粵西來任路經楚黔日覩大箐之中雲樹叅天日光不到卽夏秋之交尙有冷氣逼人當此寒冬栗冽竟成冰穴大樹之中林簿叢密籐蘿纏結虎豹成群人跡罕至必需夫斬伐開徑爲容身之路火炮刀鎗防猛獸之奔逸且蜀中居民與他省不同平日旣乏皮襖又無絮衣驅此啼饑號寒之衆修溪山密箐之路無衣無食何以禦寒必致冷凍顛仆一慮也倘有一二

顛仆四外居民聞風奔竄是工尙未舉而地方已爲騷動二慮也隆冬天氣民徒無依相聚爲奸是目前所必無之事亦古來所恒見之事意外可虞三慮也成龍身肩重委不敢不過爲顧慮復思成龍入箐必與本地文武官員同行文官有衙役或可令備斧頭鈎鐮凡密箐無路之所指揮砍伐武官有兵丁或可令備火炮鎗刀以防猛獸且大箐所在四圍併無村舍若朝入山而暮就舍則奔走於茂林蔓草之域往返耽延必遲時日何以報命必須武官帶一二帳房借抵溪箐日暮攢宿於箐中庶無出入往返之

遲悞而功可刻期告竣但成龍位微兼屬同寅勢在難行
伏祈憲臺迅諭武隆南川等處文官衙役備修路之具武
官兵丁帶防獸之器仍攜帳房爲露宿野處之蔽是可不
用民間一夫而地方自安靜無驚至於國家安危生民
休戚憲臺封疆大臣自有灼見非成龍所敢輕議也

張撫臺復書

武隆酉陽一帶地方素產楠木所以特遴門下遍查
耳及接來翰山形地勢燎如指掌併分五路並進到
處插牌樞記認具見門下措置井井有條乃所報之
木並無一株合式者門下可悉心確查如獲巨料不
佞自於疏中題敘以酬門下勤勞也萬勿以尖細
者搪塞可耳不盡

請復祀典詳文

爲詳請 題復祀典以光盛治事照得一代之興首重祭祀之禮在外府州縣職司守土各有宜祀鬼神載在舊章萬世不刊一切香帛牲醴咸支用各處正賦錢糧纂入經費全書煌煌典制率土遵行如春秋丁日祭 至聖先師啓聖公梓潼帝君戊日祭社稷山川風雲雷雨城隍土地諸神三月初一日七月十五日十月初一日祭無祀孤魂或以崇文教或以敦祈報或以恤幽魂皆有祭享一定之期簡而不數豐而不儉是誠

聖天子百神來享之盛典也有司奉行罔敢怠忽成龍新任合州目覩地方荒殘招撫百姓爲急務然當安輯之初必須培風化之源重衣食之本釋厲鬼之恫則至聖先師爲禮樂文物之祖社稷諸神爲百穀生成之佑至於無主孤魂倍宜憫恤蜀土遭劫屠戮白骨滿地燐火遍野往時民人寂寥雖悲號夜月無能爲祟茲流民漸歸烟火漸生則此等無主孤魂當人間祭祀之期必悽愴愈甚恩祀不及怨氣所激或爲災眚或爲妖孽必然之理以上諸祭祀皆宜急爲修舉不可闕一者也曩因蜀中田地未闢賦稅無多祭祀未舉遂爲缺典間有有司捐俸舉行或派居民相助然未蒙

聖恩神鬼必不歆享且以如此重典而下爲吏民捐助適所以羞朝廷而輕大典矧今日車書一統富有四海一切祭祀舉無缺畧何獨靳毫末之費而俾蜀疆神鬼不得霑聖天子之恩與伏乞憲臺裁奪題請修復祀典豐儉之宜動支本處正賦錢糧銷算或開徵糧多者從豐開徵糧少者從儉俟田土成熟漸次如禮則蜀疆神鬼均受皇恩而於一代之典制有光矣事關大典冒昧上陳

...大典...
...大典...
...大典...

請正朝儀詳文

為詳請 朝賀儀式以便遵行以垂永久事照得 朝賀

大禮天下遵行臣子敬君自有一定之儀恐難以邊徼殘

荒儀制隨分參差成龍原籍山西永寧州凡遇 朝賀各

官前一日昧爽齊集 萬壽院習儀祝

聖分班跪迎

萬歲龍亭前至州治大堂本日昧爽各官齊集州治向 龍

亭行 朝賀禮有司詣 龍亭前跪廩生宣祝 聖文畢

復位分班跪送此成龍原籍 朝賀之禮也成龍初任廣

西在柳州府遇冬至 朝賀禮前一日提督分守右江道
併文武各官齊集分司衙門習儀迎 龍亭至柳州府大
堂本日昧爽文武各官齊集柳州府衙門文東武西魚貫
而進提督與道官上月臺先行 朝賀禮分東西面立後
文武各官在月臺下東西行禮畢通贊禮生唱祝文引贊
禮生引知府詣 龍亭前跪通贊禮生唱衆官皆跪廩生
宣祝 聖文畢知府復位分班叩頭跪送 龍亭此成龍
目見柳州府 朝賀之禮也今當冬至成龍肅查 朝賀
儀式因地方荒殘原無上頒定規往歲文武各官前一日

齊集嘉福寺習儀本日仍於嘉福寺行 朝賀禮此合州

舊歲 朝賀之禮也 朝賀大典

天威咫尺臣子拜蹈罔敢差失第成龍素未習禮又無頒式

未知在寺 朝賀與在州治 朝賀孰爲正禮又本日祝

聖文云維某年某月某日某省某府州縣臣等荷 國

厚恩叨享祿位皆賴天生我 君保民致治今茲長至

聖壽益增臣等無任踴躍懽欣之至此成龍原籍與粵西

祝 聖之詞今查合州舊儀將冬至進 賀表文宣讀又

未知二者孰爲通行定式夫以合州荒殘典籍逸失當草

創之時儀文缺畧然 朝賀大禮臣子不敢苟且但儀式未頒成龍寸心難安謹將儀式申請伏乞憲臺裁酌舊章俯准頒賜定式遵行雖地方荒殘而威儀漸有可觀則尊君之禮大彰而典制可垂永久矣

規畫銅梁條議

一在外流移宜招也自甲申之變黎民逃至土司爲其迫脅留難者有之或流居別屬因種糧而逗遛不歸者有之或原係宦僕又負人錢債懼主索財畏縮不歸者有之或一家先歸而爲民上者不論歸與不歸將名入冊以阻歸志者有之爲今日計或遍發告示或坐名關取或見在載冊之民歸自外方凡有父族母黨給以照票令其招揀招到三五家或五六家俱准入本名戶下俟三年例滿輸賦使在外之民播聞此風各自襁負而至矣一土著流寓旣

入版籍俱係縣民理宜和也夫食毛踐土悉屬朝廷赤子兼奉定例凡一插標卽爲已業後亦不得爭論今載冊者多屬流寓萍踪以克戶口在流寓之民見有房有地願自整理整時別無人言及至料理齊備土著則云族人之業或云母黨之產彼此爭奪禁人插占甘心傾圮若不嚴示地方終無起色不惟不廣招來卽見住之民日益思散矣一荒田宜闢也查縣屬所轄二十六里載糧二萬二千有奇今歸籍者寥寥載冊者僅三十有九奉行清丈之糧三兩一錢有零開墾萬不及一各民又防京丈將見開之

田懈怠如單夫隻妻租牛辦穀一年不足一歲之用終無展眉之日猶幸安堵如故務須給示獎勸教民廣墾男耕女織各守其業毋致饑寒仍應差人逐月採訪勤惰勤者賞之情者懲之如此鼓勵自是家給戶足比屋蓋藏之慶矣一風俗宜整也查銅邑地方向稱人文禮義之邦自張寇變亂二十年來人烟絕跡雖經開復禮教未與歸籍之民間有幼時拉入營伍竟不知孝弟忠信爲何事酗酒放肆任意橫行官遠法疎縱橫得以自便雖有鄉官幾人本無官守言責同居桑梓誰人得而禁之務令上下二鄉設

立鄉約各一名每遇朔望持 聖諭六條諄切講諭以禮讓爲先勤儉爲本戒遊逸賭飲無以小過而不改問有不遵約束者許令指名報究使知目有 王章勿令若輩視法如弁髦也一縣城之駐防宜撤也當年 王師進滇經過銅梁因王眷尙未遷移每被逃兵過銅劫掠自遷移之後逃兵久已絕跡前以銅梁有官有印蒙上司設兵駐防誠爲衛民久安長治之基今銅梁官撤印繳民雖零星野處而數年逃丁賊盜消弭以城內八九戶之民安用三十餘名之駐兵耶兼以本領不能鈴束兵卒動輒酗酒恣肆

大營尙在夔門相去千有餘里前有合州駐鎮可以節制今云已裁愈不能約束矣應否詳撤庶免殘黎滋擾一寡婦幼子宜恤也天下最苦者莫若寡婦伶丁無告者莫過孤兒自宜優加憫恤乃有好弊陋規令人詫異者如夫死妻必嫁之言雖未可槩信而有等奸民乘民婦夫死視爲奇貨或有隣居出備衣衾板木代葬經年累月不卽取償扣算本利若干逼其再醮天理何存寡婦無門可訴寧甘受嫁索財更有賄送官長紅銀假此因公苛求雖奉兩院勒石碑禁公然視爲故紙今吏治清賞罰明宜立法飭行

嗣後有翁姑主婚者方許出適若無翁姑叔伯者當聽本婦自便不許奸民逐逼庶生者安心死者瞑目也

張撫臺復書

合陽荒殘冲瘡得高賢撫而緩之自必漸有起色頃聞初蒞新政驅冗役却輿從及絕無名之應付清操毅力卽此已見一斑甚快甚慰也承賜廣藥二種謹登但二藥所醫何病便間望併示知附謝不一

請留合州營防兵

爲殘疆之危險堪虞經制之防兵難去伏乞本提督始終重念地方會同撫臺酌議題留免更舊制以保殘疆事照得大臣謀國固相緩急以設防禦而下吏守土亦審時勢以詳去留本提督開闢蜀疆剪除群寇躬親戎伍險阻備嘗及成功大定度形勢之或險或易議防兵之宜有宜無會同前總督李爰定經制爲國家久安長治之圖灼見合州據三江之要會六路之總必需營兵坐鎮以資彈壓乃新設將領兵丁五百員各載在經制垂之永久成

龍於本年九月初六日到任尙未熟悉地方要害風聞裁合營兵之議驚惶無措姑就營兵之有關吏治者條晰上陳蒙撫憲批候部議在案嗣後成龍審閱合陽山川風景扼重夔之上流當順保之屏障地勢險要么魔敢於盤據烏合易爲糾集每當歷代季世遂爲瓜裂如釣魚城之舊跡純陽山之石刻鑿鑿可據以是知本提督與前部院李老成謀謨增設營伍憂淡慮遠茲本月二十四日接閱邸報爲歷陳邊地等事已經奉

旨依議是部臣據疏叅酌知永寧之爲邊慮而未知合州之有隱憂也爲久遠之計本提督焦心爲國瞻前顧後已定之經制必不可更爲目前之計則成龍利害切膚審時度勢已裁之成命尙需挽回本提督封疆大臣凡地方利害知無不言如合陽之裁兵實關地方之安危事非渺小伏乞憲臺重念甫定之殘疆不可輕爲搖動萬全之經制難以驟爲更易會同撫憲酌議遠圖 題請遵照舊制留營駐防庶初年之經畫有始有終或以永寧重鎮勢需增兵然重慶新設總鎮衙門所有城守三千之兵去留未定亦可通融調撥則合陽之營兵可不裁蜀省之經制可不

更而中外之士字可以寧謚無虞成龍腐儒不達時務祇
因利害當身激切再陳統祈憲鑒

守武昌請復臨湘驛站

爲懇詳迅起岳站等事本月二十七日據蒲圻縣詳稱鳳
官港三驛馬夫徐但陳等稟前事該本縣知縣張圻隆查
看得蒲屬三驛接壤岳州長雲等驛原奉編以六十里爲
一站所以節勞逸惜物力也目今隣邑未行起站無馬換
騎節經大人差使往上俱經越站長驅三百餘里以致夫
馬困疲前馬旣去後差無以接濟差使絡繹勢必貽悞關
係匪輕合無詳請俯念驛傳急務轉詳蚤發岳屬馬匹各
驛起站接換庶軍機無悞人馬得甦等情到府該本府看

得湖北蒲邑與湖南臨湘爲隣蒲有官塘鳳山港口三驛
臨湘有長安雲溪二驛雖有南北之分而驛站實爲血脉
相通之路目前蒲圻三驛招撫馬夫增補馬匹應差無悞
奈臨湘兩驛未設將港口之夫馬越站至岳港口勢不能
支將鳳山官塘夫馬越站至岳路程愈遠夫馬愈敝是以
臨湘未設之驛而累及蒲圻已設之驛恐三驛夫馬愈敝
則差使絡繹將何以應此該縣據馬夫之稟而急申請也
伏懇憲臺念郵傳關軍前急務刻不容緩移會偏院設法
馬匹蚤立臨湘兩驛則蒲驛不至拖累軍機得以迅傳

收復蒲圻報張撫臺

成龍奉憲委修咸寧河橋李守備協力巡驛各員相助初
七日工成已經飛報在案初八日至蒲圻官塘驛宣布德
意有大貴雙坵二團鄉民投見成龍遵發憲示鄉民罔不
悅服亦經飛報在案初九日沿路鄉民迎接泣訴各有陳
詞現經彙繳咸乞憲示但頒發者已盡懇領甚衆祈速多
頒以安人心本日晚成龍同武昌衛李守備城守王把總
金口郭巡檢咸寧衛典史渡河進蒲圻縣城寂無人烟止
有原任丁憂巡檢潘宏錦閤家在城隨查縣有六門卽壅

塞四門僅留北門水門以通往來以便修橋所有收復蒲
圻緣由合就飛報

咸蒲浮橋情形報張撫臺

咸寧橋成洪水衝壞是實天降災殃也咸寧古有石橋亦
被山水衝傾而一浮橋又安能支泛漲無涯之水成龍初
九日冒雨至蒲圻大雨水漲漫無下橋之所已經申報在
案初十日料理物料十一日橋梁雨中成就值有咸寧橋
被水衝之報成龍心神慌亂忙無措手本日蒲圻大雨如
注水聲如雷是咸寧已壞之橋不知如何復修目前蒲圻
已成之橋又在十分危急也成龍的於十二日赴咸寧多
方布置物料力謀再舉不識天意何如合就申報

又報張撫臺

看得居官辦事務宜詳慎况軍前重情何得張皇妄報以啓不測之禍如署咸寧魯經歷其人者署咸寧之事不能修咸寧之橋一味躲避全無擔當受成龍看守橋梁之責值山水暴漲自宜小心照管倘有衝壞自應僱夫補修何因水漲不察橋梁有無衝損輒自妄行申報致成龍驚惶冒雨行至辰山已經飛報在案於十三日蚤辰一路覓船行至蒲圻界外嘉魚縣黃土坑地方進湖僱船每隻給銀三錢豈意彼地百姓將成龍跟役亂打丟入水中成龍親身勸覓仍行持鎗執棍吶喊搶奪逼成龍急跳大湖之中魚驚爲隣船戶任克明亦跳入湖甘蹈不測浮水拉救上船是皆魯經歷妄報以啓不測之禍也所有衛典史稟報情由合先報明以舒憲慮成龍一月以來筋疲力竭神氣耗散暫養一日的於十四日回省合併敘明

籌畫蒲圻防守報張撫臺

看得蒲圻城內留兵防守必然之勢也然止留一將領足矣恐主將多則兵丁難於約束士民畏懼不歸依然一空城耳且兵丁盡住民房目前士民歸來將何爲安身之處更有不忍言者民房家資木器已不可問再過數日土底蓄物亦在難保士民歸家一見傷心必號泣而他往成龍亦乏撫循羈縻之術矣伏乞憲臺酌留何營何將該兵若干牌行遵照或止留城守王把總兵三十名防守城池遞送塘報亦足濟用今日之事兵不在多止在收拾人心而

已

籌報各屬情形上張撫臺

成龍駐守蒲邑士民初有歸意可憾與國蘄州黃州德安
逃兵回營浪布流言人心震驚蒲邑附近各縣危如累卵
上憲差使惶張空回一應公文塘兵打轉道路梗塞通城
文武恐懼離汎賴有崇陽一縣砥柱中流差役揆成龍動
靜地方稍寧通城因之報文回縣嘉魚自寇夜來明去後
避居鄉間聞今亦已歸縣蒲邑漸有歸民村落擊鼓插秧
山中採茶肩擔沿河船隻貿易未盡斷絕前尼將軍票查
病駱駝一隻成龍差武童賀世沿賚收管繳營本月初六

日午時來見言四月二十九日離營我兵駐扎離陳陵磯五里附近大江糧米不絕止缺燒柴二十三日陸路大戰殺賊無數滿兵引他看殺死者俱係頭有長髮二十四日水路大戰砲打壞賊船無數二十七日二十九日陸路俱大戰每日我兵四千餘人巡哨此係確信本日忽有大冶縣報文二角武昌縣報文一角愚民作祟恐縣文失之驚張亦宜蚤爲安慰大冶逼近興國有柯陳二家且通城久已思亂嘉魚頑悍異常倘聞風附和大爲心腹憂縱殄滅不難亦傷元氣守憲素得民心勅速發示以遏亂萌且撫

有柯陳庶民密差曉諭解散發兵防守此正著也恐愚民生疑反逼成釁端是解散防守緩急之間憲臺自有萬全長策依成龍愚見俾興國將領嚴加提防通山武昌兩縣發重兵守禦且置大冶於不問順而撫之則反側子自安不發兵可無走險之虞發隣兵以張鎮壓之威且以杜隣封通謀之漸未知可行與否此事關係非小而役資投伏乞憲臺垂念封疆密與守道計議若守憲肯親臨大冶相機安撫自可無事但不可輕帶兵耳前日逃兵各懷疑懼務令各營將領收拾安慰加以告病假歸名色無使密釀

禍種聚而成黨再懇將大冶通城通山咸寧所供荆需移
會督臺暫緩以安人心成龍爲地方起見非敢乘機怠緩
軍務也統惟憲裁成龍僻處山隅鞭長不及以貽憲慮罪
難擢數蒲邑大水冒城堦垣推倒城內房屋傾圮合併附
報

于山奏牘卷之一

終

于山奏牘卷之二

晉西河于成龍北溟父著

爲武昌各屬請緩徵上張撫臺

看得府屬州縣驚鴻未集民生失所尙望殊恩安輯若復
議徵恐小民輸納不前軍需必致違悞悉陳各屬情形懇
乞憲恩生全如蒲圻嘉魚逼近臨湘寇賊犯境雖飄忽而
逝然士民驚避罔顧農業通城密邇平江民不安生復被
賊夜襲城黎明遠颺而煙火已絕咸寧聯接蒲圻人民遠
竄湖山境內十室九空崇陽處蒲咸通城之間雖未流離

而警息時聞不能盡力南畝至於大冶當風鶴之餘土寇
作祟卽不終朝而滅斯民已受疑畏與國武昌通山與大
冶爲隣土寇煽惑兼以逼脅肆虐生民不得樂業江夏爲
省會首縣衝煩疲苦民不堪命是各屬危苦情形久在憲
臺洞鑒中茲奉查議合就據實直陳均當軫恤安輯以恤
民生則開徵之議恐尙非時似應仍前緩徵以救民困庶
小民無催徵危迫之虞有司免違悞軍需之慮

辭武昌任請署員上蔡制臺

爲軍務事本年六月十四日奉 總督部院蔡憲票差官
張虎前去武昌府着落官吏查照後開穀草數目勒限全
完協同解官人役限本月中旬以內飛解來荆接濟等因
奉此該職遵查於六月十六日爲亟請署員以理府治事
照得成龍係黃州府同知于本年三月初九日委署武昌
府事因就近補授一案授武昌府知府尙未領憑值 禁
旅南征成龍奉委修搭浮橋被山水衝毀失悞軍務 題
叅部議處分應遵奉離任且成龍奉撫東山遙隔省治一

切府事俱高閣耽悞如軍前草束舊欠新派不及催辦
欽案部件熱審重情不及清理負罪滋深幸東山已靖撫
事已竣本月初七日詳撫憲候批歸省蒙批一應安插善
後事宜該府必須計慮停妥另詳報奪回省成龍凜遵撫
事雖就而善後非且夕可奏仰體憲慮爲地方生民圖久
安之計目前清查保甲立守望相助之法延日逾久積案
愈多現今武昌同知新任正可接署料理府事伏乞憲臺
俯念 欽部案件軍需關係重大迅委同知接理成龍受
守憲籌畫得以盡心効力不敢以去位貽害地方生民等
因具詳憲臺未蒙批發又于六月二十五日奉布政司信
牌爲特叅違玩官員事本年六月十四日奉 撫部院張
憲牌行司照牌內咨文奉

旨事理欽遵施行等因奉此看得成龍原任黃州府同知本
年三月初九日委署武昌府事蒙 題補武昌府知府尙
未領憑因浮橋一案 題叅革職例應解任伏乞憲臺勅
司速詳委員署篆理事庶一應軍需 欽部案件責有攸
歸等因于六月二十六日申詳亦未蒙批發今奉憲差催
穀草隨該看得自五月二十二日成龍委撫東山未嘗一

刻念解荆軍需柰羈處僻隅不能分身以應憂心如焚亟
欲撫竣回省料理又因善後之計多方布置非旦夕可就
唯恐日久遲悞于六月十六日詳請委署催辦軍需又本
月二十六日詳請署員接理撫事軍需兩無違延俱未蒙
憲示茲差官目覩成龍艱辛疲病之狀事出兩難伏乞憲
臺查批原詳仰鮑同知接印理事刻期督催庶可有濟

爲黃州各屬報災請蠲上張撫臺

該成龍于本年八月十一日至黃州府查緩徵已荷等事
一案前府余三汲于本年七月初五日呈詳內開黃梅兵
燹之後民貧土瘠今春滇黔叛逆人心風鶴棄室家而飄
泊不能自保至人心稍定播種業已過時况三春霪雨二
麥沍爛兼以北來大兵前往江西道經麻城圻水廣濟黃
梅而黃陂諸縣俱有兵馬經過是黃民疲于奔命者靡有
寧晷自五月以來旱魃爲虐職受事數日卽據士民哀控
疾苦所見溪塘盡涸田苗皆枯秋成旣已無望入口終歲

絕粒有朝不保暮之憂民卽剜肉而無肉可剜吏卽追呼而無民可追黃梅廣濟羅田各屬士民疊籲災荒縣令屢詳賑恤幾于淚盡出血俱久入憲鑒中若不急急請蠲不惟民慮開徵各鳥獸散且饑寒迫膚又能保其不挺而走險哉合無詳請 題達蠲免本年正賦以免一時凶荒等情申詳在案又查七月十一日據黃岡縣知縣李經政詳報爲災旱非常籲天求活等事據里民劉鑑等呈稱今歲自春徂夏霪雨連月自夏徂秋赤陽不雨穀種未收顆粒當此軍需孔亟救死不贍誰能急公好義謀生之念孔殷

逃亾之心益熾伏乞恩詳請蠲等情該縣看得黃邑殘黎旣離亂而失業復遭旱以致災滿目荒涼到處哀號申乞矜憐民命轉詳凡十三年未徵者盡懇蠲免使鳩形鵠面暫留喘息地方寧謐不至流亾等情申詳在案又奉藩司牌爲風鶴之流民雖還旱澇之災黎堪恤等事于本年七月二十五日奉 巡撫部院張批據蘄水縣五十八里士民高依陳業和等呈前事呈稱訛言驚怖城野多空陰氣所感二麥悉屬澇傷繼以亢旱五穀全爲旱虐他邑之傷在澇而蘄邑不僅于澇他邑之虐在旱而蘄邑更烈于旱

等情蒙批委員確勘彙詳通報繳爲照報災定例極其森嚴該縣印官所司何事竟不據情詳報以致士民違例上控殊干法紀仰府卽查蘄水呈控旱災情形等因遵依奉行在案又查六月初五日據黃陂縣知縣金殿臣詳報爲穀死命盡急求呼籲等事據里民潘貞等呈稱軍興芻午朝求夕應之秋二三月靈雨疊至春麥沍爛五六月滴雨俱無秋稻死傷懇乞詳請特疏 題達本年額賦盡行豁免始得免填溝壑等情該縣看得陂屬低下者死雨高阜者死旱兩災並至若不急求 題請則版籍之民不死本

處定徙他鄉賦自無完等情申詳在案又查七月內據黃安縣知縣徐秉仁詳報爲旱災異常禾苗盡稿懇詳具題爲民請命等事據三鄉王宗三等呈稱黃安土瘠民貧本年正月內採買軍需一方菁黍爲之一空又兼風鶴頻驚流離失業自夏徂秋雨澤久愆禾稻盡焦兒啼女哭少壯生輾轉之心鵠面鳩形老弱慮溝壑之慘伏乞軫念軍興芻午更憐饑饉恩詳請 題請蠲請賑等情該縣看得自夏徂秋旱魃肆災山田如焚念里民措辦軍需髓膏已竭又遭此災傷流亾載道恐鄭監門弗克繪其圖伏乞轉

達請 題以救餓殍以安爲盜之心等情申詳在案又查
七月十五日據麻城縣知縣屈振奇詳報爲異常旱傷民
苦已甚等事據里民王彭等呈稱麻邑土地高燥自五月
二十四日一雨至今七月十五一雨不滴垂成者風捲泥
土方長者稿若霜毫當軍興芻午之際加以旱魃爲虐之
慘乞恩轉詳軫念等情該縣看得早稻皆爲腐草晚禾盡
屬焦枯塘堰捲灰河港成路申乞轉詳造福等情申詳在
案又查七月內據羅田縣知縣王光昇詳報爲災旱之餘
方苦軍需惟求正供之或蠲或緩以全失業之民等事據

里民張文雄等呈稱二三月間人心有風鶴之驚五六月
間禾苗有旱魃之災逃避徵輸者十室九空失業拋荒者
十常八九乃草束槽刀一批已解一批將起一差未去一
差又來小民之財力有限一身之膏血無多倘不蒙法外
之恩議蠲議緩勢必再逃再亾總之自分一死耳與其死
于法堂不如死于山谷與其死于催科之敲朴不如死于
逃散之饑寒與其死于虧 國賦對法吏之難可解免不
如死于隨父母挈妻子之尚可遲延伏乞收拾久散之人
心永保無意外之虞等情該縣看得驚竄之餘又遭天時

亢旱禾稼焦枯 國課爲目前亟務而民命亦在所宜矜
等情申詳在案又八月十二日奉藩憲牌爲八歲六災今
夏最慘懇詳檢踏早賜蠲賑等事據羅田呈詳行府遵依
委踏在案又查七月十三日據圻州知州李成材詳報爲
災傷倍甚于當年救荒更難于今日亟懇詳請早爲立命
事據里民張重高等呈稱兵馬往來百姓奔竄農桑廢棄
田地拋荒又重以洪水淹沒夏災已不可言祇緣播遷未
歸以致失時不報詎知旱魃爲虐遍地如焚禾苗枯焦門
內之嗟怨何堪戶外之追呼行見析骨易子誠爲慘痛勢

必有死無生伏乞申詳請蠲請賑等情該州看得圻州田
土盡在山壤初春因商羊肆虐盛夏又旱魃爲災值吳逆
猖狂鄉民輕聽訛言各棄本業遠避山湖是早禾之東作
已廢卽有佈種晚禾孰謂驕陽爲害四野枯槁心殊慘惻
乞賜轉詳 題請議蠲等情申詳在案又查六月十三日
據廣濟縣知縣潘士學詳報爲水漲滔天絕禾絕命懇賜
申詳以甦民困事據濟邑鄉紳胡魁楚等呈稱今春逆犯
楚境邑民遠竄潛逃蒙諭歸家務農慘在五月天雨連朝
洪水泛漲田地化爲東海民屋盡爲魚窟妻啼子哭將來

開徵比納無賴伏望詳請蠲賑救民水火等情該縣看得
濟邑邊臨內湖接壤外江自春徂夏靈雨連綿一望汪洋
春作既已淹沒兼以軍興旁午又值天災流行萬民號泣
伏乞轉達 題請蠲賑等情申詳在案又查六月二十三
日據黃梅縣前任革職知縣王庭龍詳報爲驚鴻之失業
堪嗟洪水之爲殃更慘懇請蠲賑以救殘黎等事據里民
郭興勝等呈稱梅邑路當八省要衝兵馬絡繹蹂躪百姓
驚逃隣省四野之東作皆空將來之西成無望蒙招撫漸
歸詎意自二月以來靈雨連綿洪濤泛漲田地湮沒屋舍

漂流巢居露處婦哭兒啼不惟畝畝之禾苗變爲滄海卽
往來之大路盡成澤國哭奔迅請立賜蠲賑庶驚竄之遺
黎免奔他邑等情該縣看得梅居楚末勢當下流因逆亂
之訛傳百姓盡驚逃于隣省其栽種業已愆期勸撫甫事
耕耘正當夏秋之交大兵往來如織因水阻道沿山扎營
而山地之農功盡歸烏有矣尤慘者自二月至五月靈雨
不止洪波泛漲田廬俱漂往來大路浸沒無踪亟請具
題蠲賑留此一邑災黎爲後日種田輸賦之資等情申詳
在案又八月十二日奉藩憲牌據黃梅縣知縣李成材詳

稱闔邑災民盈庭泣訴迅賜賑恤等情行府遵依在案該職覆查看得天災流行所在恒有或災于夏而有報蠲夏災之例或災于秋而有報蠲秋災之例未有如今歲之水旱相仍夏秋並災之甚者也遍閱九屬士民痛顛州縣哀請真淚溢紙上悲不成聲成龍不覺心酸涕流雖夏災報逾定限乃緣風鶴有驚士民奔竄呈訴愆期性命之念重初不計及水旱之洊至誠有如蘄州里民張重高等呈稱播遷未歸以致失時不報之詞確爲真情通計一歲正賦錢糧旣免夏災復免秋災所剩徵納協濟軍需亦無幾何

當此遇賊交訏之日荆岳用兵之時訛言起滅不常士民居徙無定誠有如前府余三汲所詳恐欲徵而無民可徵之語實爲有見至于老弱溝壑少壯流離慘不忍言饑寒切膚群聚爲盜宜爲後慮此各屬士民有寧死于他鄉爲民請命計出萬全之詞誠有如前府余三汲所詳挺而走除黃安知縣徐秉仁所詳以安爲盜之心瞻前顧後均有禪 國家之石畫也逆賊作亂人心共憤指日授首當事請協餉以濟軍需暫寬此日災民之命將來百姓感恩踴躍輸賦報効者正自無窮誠有如黃梅縣革職知縣王庭

龍所詳留此一邑災黎爲後日種田輸賦之民可謂痛哭
流涕實意爲國爲民者矣成龍更有請焉目前荆岳進
勦備辦槽斲鍋桶起運草束穀米等項無不藉民力以輸
將若寬小民今歲之賦雖未得小民効順之財而歡呼趨
事亦可得小民効順之力矣可得小民効順之心成龍愚
昧不識忌諱統祈憲裁詳請題蠲除未奉緩徵之先各
屬已徵銀兩並照秋糧盡數恩豁以救民命以培國脉合
據黃屬士民州縣呈詳妥議申報

初守黃郡上張撫臺

成龍于七月二十五日在麻城縣望花山准武昌府關移
委官賚黃州府印信本日叩恩接印理黃州府事于八月
初四日離望花山初六日至省回復撫部院嚴命又因新
派槽斲鍋桶等項軍需向閩司領協餉置辦羈遲數日于
初十日辭赴黃州十一日巳時到府卽將草一百萬束照
糧均派行各州縣催解已經報明在案又軍需困民已久
成龍不忍將槽斲鍋桶等項再派民間情甘自任其勞分
委屬官覓買木料差役調取匠作買辦鐵炭楠竹籬筐木

二山奏牘 卷二
掀撮箕等物查結各憲守催事件拮据半日神已昏曠十
二日蚤親看起爐處所復清查堆積公文有黃岡縣縣丞
王公濯呈繳日收公文自七月十七日起至八月初十日
止共折公文四百六十一件十二日舖司投遞公文九十
一件共五百五十二件自己時至二更方行拆完成龍不
覺頭暈目眩嘔血不止查各項公文堆積如山咸係要件
非經承敢于怠玩亦非成龍敢于懸閣皆緣缺員塵封一
時何以速理且成龍于本年初九日理武昌府事晝
夜不遑四月初四日委往咸寧蒲圻于五月十五日歸省
卽辦解岳州軍需五月二十二日委往麻城東山于八月
初六日方得回省數月奔走身履危險罪戾滋深精力已
竭夫以積勞之微軀一旦覩要件之沉積頓使心神驚悸
感成癆瘵之危症目前扶病料理務期新派軍需毫無違
悞但恐病勢危篤將來不可保也合先稟明

張撫臺復書

積勞之後慎勿過于鞅掌以致欲速反遲也接來翰
殊爲念切幸善爲調攝以慰不佞惓惓麻城一案備
述賢勞已繕疏具 題矣附聞不一

籌緝逋寇報張撫臺

史國柱包藏禍心煽惑地方蒙憲臺面諭密緝成龍凜遵
指授幸未漏網鼠賊就縛咸仗憲臺威靈成龍何敢當獎
諭優溢練長王芳遠等荷憲恩隆厚特賞袍帽銀兩成龍
愈踧踖不安茲奉密諭孫調元汪華之陳克韶成龍刻卽
設法迅擒倘遁入黃安便爲籠中之鳥決不致免脫貽禍
內地但成龍新聞陳鼎業陶白雪潛逃九江苦無的役緝
拏唯望王芳遠張漢一方茂貞來黃密議陶楊二生成龍
給以委牌俾防守畢家鋪一帶地方又六安麻埠告警密

邇羅麻成龍于羅田界隣六安英山等處已發委牌諭有
身家生員豫爲防備仍委武舉張尙聖赴羅偵探成龍揣
度時勢另具密稟伏乞憲鑒又招募鎗手係生員吳之鄒
經理成龍因黃梅饑荒募穀四百餘石委生親往賑救尙
未回黃侯吳生回府清查頂替情由另報

張撫臺復書

奸人屢擾內地此番又擒史國柱皆親翁之妙畧也
但孫調元尙邇逋誅聞其同行有兩人一爲汪華之
一爲陳克韶同遁入黃安一路且聞譚以從陶克凌

李素之係其親密舊好查譚以從等舊係招撫之人
尙未發回羅山幸親翁密授方畧俾其迅擒賊首調
元不致兔脫切速切速端此不一

張撫臺又書

水師鎗手尙未足額正在需人吳生招致六十三人
具見急公之義已據守道文報俱發營收伍矣王副
將病故身後之事幸親翁就近善視之不佞已卽爲
題請存恤矣不一

言人與生臥姪六十三人

籌捕陳鼎業等報張撫臺

才疎性拙幸逢知遇格外殊恩感佩終身黃麻東山仰賴
憲威頗稱寧謐孫調元就擒已除腹心之禍止有陳鼎業
仍祈溫諭張漢一遍緝料難漏網訪孝感山崗中藏賊甲
三十副烏鎗數十杆已密差查起未知虛實江右寧州賊
平與國大冶無驚而黃州可以安枕伏乞憲鑒外程鎮邦
家貧糊口不給武舉魯試挈賊盜一案久在武昌統冀恩

施

張撫臺復書

狡逆作祟煽惑鄉愚致令無知交相受劄已獲者自應解往武寧聽其質對未獲者多方躡緝以靖根株至於無辜弟姪非緣坐者應予保候以安人心若夫未經供出或名同字異者平素與其往來尤當令其自爲舉首以邀減免是亦好生之德也率復不盡

籌畫預備上張撫臺

今日之時勢靡定人心之向背無常相機制勝圖萬全之策在封疆大臣審先後緩急之宜而已成龍下吏沐恩高厚稍有聞見何敢緘默不言去歲滇黔告警人心蠢動此時勢之一大變也 王師雲屯荆鄂鞏固而人心定矣嗣後江右告警人心復爲蠢動此時勢之又一變也 禁旅電馳府縣恢復而人心再定矣目前秦川用兵聲聞不確人心易于搖動奸宄煽惑潛謀叵測此時勢之變之又變矣凡所以肅清內地謹防外寇無一事不爲要務憲臺受

國家重任晝夜不遑形神勞瘁而此時之焦心愁思更以湖北繫天下之安危愈不得不蚤爲之籌畫矣今歲元旦生員吳之鄒在署成龍命占一課得旅卦官鬼不動主無賊寇但恐四月有一小警立春日命程鎮邦占一課亦係旅卦官鬼不動恐四月有一小警本月十九日徐司獄寄一課係鼎之訟斷云地方反側已安四月有一虛警無害五六月漸就平息勿慮成龍愈憂之蓋徐司獄之課最驗去歲成龍自蒲圻歸武昌也占主敵人受降未幾而有招撫東山之役自撫竣而赴武昌也占云東南還有一行

冬月而果有剿何士榮之舉茲占四月有警安敢不豫爲隄防黃府屬所慮者麻城黃安羅田黃梅四縣今趙提督鎮守潯江黃梅可無虞也羅田年來安靜無有釁端成龍諭生員蕭二至小心謹守麻城渠魁殲滅猝難再禍且有協兵五十名駐扎項家廟虛實動靜可以緩急相聞所慮者黃安離府太遠譚以從倡亂之時城中紳衿聚蒼頭數百將爲內難以從一撫居爲首功今以從未歸羅山又不便發兵防守此處稍有疎虞成龍于黃麻地方命鄒家河貢士鄒世美練鄉兵五十名潘家塘生員蕭命福練鄉兵

一百名牙魚坑余忠信觀音閣陳玉環共練鄉兵五十名
居中豫備以防不時之警此成龍一府之事也其餘形勢
要害憲臺自有籌畫成龍不敢不鯁鯁過慮之細閱諸家
占辭應主西南則荆岳隄防更宜嚴慎成龍受恩難報惟
以所見所聞陳獻期盡此心伏乞憲鑒

聞內艱訃告歸上張撫臺

謏劣庸材荷恩提拔感戴終身茲有下情泣血上陳念成
龍父兄先逝上無叔伯終鮮兄弟熒熒一身奉侍慈幃希
冀升斗以祿養親不料任粵任蜀遠隔天涯及佐黃郡又
苦卑濕不敢迎養身羈一官心懸白雲十六年來烏鳥之
私未嘗刻忘成龍十三年有終養之請詞屢告休實爲高
堂母老中懷隱憂不得不爲之乞憐也今忽焉永訣母北
子南幽明殊隔訃音馳至肝腸慘裂魂魄黯銷號天愴地
欲見無由追悔無及痛成龍母老不能養母死不能殮目

前柩停中堂亾靈無依倚門倚閭死後望兒倍切生前成龍他鄉孤哀腐心疾首淚已血凝形已骨立惟奔喪營葬觸棺躡踊少釋終天之恨此成龍痛哭呼號而不得不爲之乞憐也伏乞憲恩垂憐他鄉孤哀母死無治喪之子施浩蕩之仁慈積萬代之陰騭轉達歸葬亾母有靈叩感地下成龍倘邀餘生焚香頂祝卽與母偕逝啣環結草永矢世世矣

張撫臺復書

歲聿云暮將屆新春矣昨具疏

請留雖勉抑孝思

實爲地方起見也幸節哀視事庶慰輿情再前任王副將勞於王事盡瘁厥躬寓在黃郡孤苦堪憐不佞殷有故人之念亦藉同志有以相成幸分付各縣一爲照拂周急之後當有以酬其厚道也不一

清免糞運上張撫臺

爲直陳糞米萬艱官難再運事竊照力役之征古今通義
前次赴荆運糞軍糈派黃州府七千五百石蒙嚴飭僱覓
夫驢勿派里甲力役誠愛養百姓培植國本之盛意也
漢陽僱騾可稱盡善武昌僱驢亦蚤有成算成龍奉文稍
遲忙不及備若買驢僱夫必延遲悞事晝夜焦思無已設
借驢之法言定驢回給主傷損官賠里民借驢踴躍赴公
毫無難色而領運無人點衙役代勞各役向隅環泣幾費
唇舌方有定局各屬照例遵行此成龍一片苦心于倉卒

之際爲濟急之舉期以上不悞公下不病民已耳無如夫
驢至荆便已疲斃日久所傷必多兼悞運事而荆州之夫
驢一呼可以萬計于是委官審度時勢僱夫之舉行焉每
石夫價有一兩者有一兩一錢五分者有一兩二錢三分
者除官價六錢五分應幫夫價自三錢五分至五錢八分
不等此外去役之盤費驢隻之草料賠驢之價值俱屬安
費咸係官賠止幸運米蚤竣爲得計倏焉二運之檄又至
矣仰在荆夫驢再運然夫驢久已各回將何以應各屬之
申請盈案紙上之哀訴盡是哭聲筆端之揮洒無非淚珠

成龍之心已碎術已窮是當年西山之運苦在民而今日
夔陵之運苦在官如逼之仍照前運有司力竭豈甘坐困
掩耳盜鈴安能舍里甲而索奇計也莫若行力役之征光
明正大官民相濟終爲久遠之法如里甲艱于遠行有前
運僱夫之成例在焉成龍萬不得已更有泣陳前次派武
漢黃運米漢陽府兩縣派米二千石武昌府除江夏蒲圻
通城嘉魚量派外尙有六縣該運米六千石黃州府除黃
梅廣濟量派外止有七縣該派米七千石前次多派米五
百石成龍以運米未必如此之苦且夫驢可以帶運任勞

一以無傷也不料一石有一石之費彼此輕重不均各屬
議論沸騰二運多派之米似難再運再有下情疊陳黃屬
惟廣濟黃梅最苦今歲又罹災傷前次量派運米迄今號
泣何堪再運或者正賦可邀 題蠲運米亦可與憲德也
此例似非未被災郡可比如以已派不便紛更查德安府
于已派內新減一千石或可援請伏乞憲裁勅司道公議
定官民運米之法施均派恩減之仁庶奉行不至遲悞軍
需可以濟矣

請免募鎗手上張撫臺

成龍質腐才疎仰荷知遇之恩卽肝腦塗地難酬萬一惟
期保障黃土舒憲臺東顧之慮幸今歲雨暘時若百室頗
盈婦子頗寧人心貼息無復去歲風鶴之驚逆黨煽惑之
擾咸賴我憲臺恩威並用深仁厚澤淪浹黃民之骨髓成
龍毫不敢有所假飾以欺憲臺也惟鼠竊狗盜未能絕跡
雞犬尙爲騷動成龍恒惴惴憂之邇來民多訛傳調軍前
之夫抽民間之丁成龍靜以鎮之訛言甫息忽于本月初
三日奉藩司牌召募鎗手某州縣招募若干名立刻催報

前此百姓之所訛傳爲抽丁者卽此故也愚民實不知爲
召募也第此亦關係地方安危大事夫以爲召募則可若
定某州縣招募若干名恐未盡善也黃屬皆耕田鑿井之
庶民有父母妻子之關切其中或有游手好閒情願爲兵
者召募入伍彼亦甘心可濟實用此招募不拘多寡行之
則可如定以州縣若干之數有司不善奉行畏上督責猝
募無一應者勢不得不押鄉保以公報勢不得不派銀兩
以僱覓恐此一舉地方多囂動矣奸人乘之禍不可測且
有成龍不敢言者遇知己之主又不忍不言也前荊州調
黃協之兵甚至親友泣別洒淚赴途光景淒慘不堪聽聞
更有一二僱覓代行彼已情願入伍尙且如此况耕田鑿
井之民有父母妻子之累一旦逼以招募之舉又不知作
何光景也伏乞憲臺裁酌俾憲臺焦心苦思剿撫經營之
地方獲以萬全如召募必不可免似不宜分派州縣限定
數目止責成成龍量其緩急陸續招解可否允行統祈憲
鑒蚤爲定議庶人心安而地方無虞矣爲此激切上稟

張撫臺復書

募兵事屬難行因兵主王題有責成督撫招募烏

鎗手二千名之說誠恐部文一到難以猝募不得不
行司酌議不意其轉行各府也此事若分派州縣必
開僉派里下之端必得府州縣善爲招募俾令樂於
從戎方得其力此皆開支戰餉將來一進湖南之後
爲兵爲民仍可任從其便幸親翁卽爲陸續召解多
多益善切囑又夔陵兵米屢准都院咨移欲於各府
派夫赴荆運解愚意若一派夫則將來便無止底且
此項米每石議定給脚價六錢五分自荆領米運夔
爲程二百四十里此項脚價若自備夫驢足以有餘
今司道議派黃屬運米七千五百石幸親翁卽爲酌
之止須得一能員料理似可不必轉派州縣以滋民
累得親翁力行更可爲各府倡率耳惟卽酌覆爲荷
切望不一

招募獵戶上張撫臺

庸材腐質蒙恩拔識寵以章服優以異典知己之感千載
一時德難酬報當此逆賊侵犯正大揚撻伐之期凡屬臣
子罔不奮勵况成龍受憲恩隆重恨不能坐展一籌少舒
憲憂寢食爲之不安于本月十二日巳時恭接憲牌取用
獵戶各縣不能奉行致違憲命但獵戶與鎗手雖同而實
異黃屬獵戶最少鎗手可學而能各屬或泥定獵戶不敢
妄報罪誠有由成龍凜遵憲檄多方勸諭招致年力精壯
習熟鳥鎗者濟時之用伏乞憲臺霽威姑宥各屬無知之

愆成龍感戴無旣緣奉軍務合先報聞統祈憲鑒

張撫臺復書

歲募匆匆五馬遽返殊愧未盡懷抱粗服聊表緇衣
之好何煩親翁齒及耶烏鎗已查收矣附復不一

爲麻城請改南折上張撫臺

麻城一邑僻處萬山之中東北與豫省光息商固接壤東
南與江南英霍六安比隣不通水次惟宋埠一鎮僅有盈
盈一水九月之後水涸沙淤需用竹簾僅裝米八九石不
等尙須人在水中牽拽百里之遠出鵝公頸方抵大江艱
苦異常此歷來南米蒙允改折久經憲臺洞悉無容成龍
瑣陳也目今軍糈扣算已定刻不容緩若俟麻邑南米接
濟夫以盈千累百之米用八九石之竹簾輓遲曠日持久
欲其速濟軍需豈可得乎在百姓筋疲力竭已不可言而

軍中之庚呼毫無裨益茲據里民梅天章等呈稱恩詳改折以從民便呼籲痛切成龍悉知麻城之山隅不近水次更審酌軍糈之緊急難容緩待不敢膜視合據詞請命伏乞憲恩憐山城水路阻遠兵食萬難刻緩俯從民便勅糧憲照例允折庶公私有濟兵民受福無窮矣

諫止採買上張糧道

成龍猥以謏劣幸荷恩培感戴終身然覆餗之懼恒切寸心目前軍糈孔亟憲臺晝夜不遑成龍屬在下吏不能少助一籌自反深漸萬亦買糧米成龍有三慮不敢不爲憲臺陳之黃屬邇來鼠竊狗偷遍地橫行憲差賫銀務宜愼密前聞有盜自省跟憲差至陽邏托憲臺洪福來差早已登岸倖免無事茲聞來差不加愼密將銀兩裝在口袋明搭騎走惹動匪類計算恐不可測此露白之慮一也賫銀採買必訪殷實經紀自可無失茲聞憲差不察虛實槩行

混領混給一夥領銀之後販猪買鹽視爲己物不惟遲悞
軍需恐此窮棍花費一盡携家逃走定煩緝追此散銀之
慮二也採買軍需係上倉糙米茲聞憲差遍發示條糙米
之外一槩收買大舡小舡絡繹不絕以致民欲買升合不
能到手宋埠附近地方李招居民已闕然不能相安今聞
牙魚坑百姓又有奮不顧身之舉此地方之慮三也伏乞
憲臺密飭差役小心謹慎細擇經紀糙米已外勿包攬客
船仍分些須以濟民食成龍不識時宜冒昧上陳可否惟
候憲裁

捕盜巴河歸報張撫臺

成龍叩謁憲堦回府料理運米苦無頭緒以致心火焚熾
又值黃岡縣夜查關廂街道城門一嚮馬驚墜傷成龍倍
加憂悶數日稍愈夫驢亦就甫得安枕不料心火外發膚
生膿胞臥床呻吟于本月初十日忽聞巴河有失盜之傳
漸不可長成龍扶病微行由徑至鎮入失主之屋細看前
後兩門並無打壞踪跡情有可疑亦不敢苟且輕易再行
密訪挈獲一犯居住偏僻素行不端十一日復以點煙甲
爲名遍訪真盜立刻緝挈當晚二更回衙十三日失主到

府文武同赴城隍廟會審失主身無點傷情更可疑當晚刻拿失主家奴十四日早審隱知爲失主奶公通盜也但此夥竊盜毫無顧忌若不嚴法以懲人人效尤將來何所底止且真盜未獲何以服失主奶公之心於十五日晚在葦源口挈到一盜卽時鞫訊自認情真十六日蚤再加細問滿盤托出則成龍前訊奶公通盜之情果無差謬隨傳失主面聽供詞陸續叫失主家僮俾盜識認第一第二供稱不認至第三乃爲奶公盜大言是他調線開門而失主俛首奶公尙爲強辯立刻卽將盜供出的黨差役分佈緝

挈大約多係興國緝捕府地方慣盜一面差役往興國遍文協挈隨將盜與奶公寄黃岡縣監候差役回府必有着落卽是竊盜申報憲臺嚴法創一懲百又勞攘數日而膿胞益勝腐不能坐手不能持腿不能站又值木料堆集江干不躬親檢查終不放心強病支持遍體疼痛不能假寐圻州木料先行圻水木料頭幫已過黃岡不過一二日裁截停當合幫赴荆地方事宜委張武舉鄒貢生沿路立堡巡防事尙未竣成龍血氣久衰精力已枯力不從心強勉供職地方一應事宜伏乞憲臺寬慮黃安鎗手李監生正

在府守催銀兩十九日蚤憲舍賚銀至卽差役賚送黃安
成龍先具實收統祈憲鑒

又籌捕盜報張撫臺

成龍才力疎庸自愧難肩重任久已憲恩俯鑒至于地方
盜賊橫行失主與鄉保朦蔽不報習染成風以致鼠狗無
忌真堪裂眚成龍已痛切上陳幸憲臺頒式嚴責成龍敢
不一力奉行若成龍屬員朝夕告誡一已之功名事小百
姓之殘害地方之擾亂事大天理良心安可以一已功名
竟置百姓地方于不問也巴河烏林二案非成龍抱忿不

甘微行密緝又蹈前轍目前烏林港一事訪有踪跡但恨
成龍力薄不能供養緝拏人等不料鼠輩仍無顧忌行劫
倍甚自圻州至九江處處變亂成龍躁激欲死又蒙督憲
嚴檄責成龍前在岐亭盜息民安何今日奉行不力反致
盜案纍纍成龍更苦之甚矣前在岐亭稍有風聲便可傳
知朝聞夕挈傾刻立擒登時處死皆躬親經理今地方寥
廓各屬朦蔽不報在成龍止以爲可幸無事誰知養癰至
此成龍疎虞之罪其何能辭無奈遍發捕役各處打聽圻
州又失兩事失主帶傷鄉保不報州官不知成龍卽刻行

查務遵憲頒式以滅此鼠輩特成龍血氣衰弱實不能當
此焦勞統祈憲憐

張撫臺復書

巴河獲盜具見摘奸發伏之奇此等萑苻橫行自當
嚴爲懲創但失事未據報聞是強是竊尤宜據實具
報毋致代爲下屬受過也瘡疾尤冀慎攝率復不一

籌荊州夫役上張撫臺

黃屬素號盜藪年來幸仗憲臺恩威兼施人心悅服頗稱
寧謐近因逃兵紛竄愚民驚慌然逃兵有散必有聚深山
窮谷不得不切意外之防目前軍需太繁尙賴各屬勉力
支持從未問及里民爲可慶也前運糞米初不料荊州有
夫費盡躊躇今王糧廳傳言荊州之夫如故先派搬運軍
器夫役州縣賚銀赴荆僱募復又派舵工水手但不知有
何軍器搬運或那用爲水手似亦妥便辦事靜鎮自無驚
疑成龍愚見督憲統兵進勦凡一應軍情事宜均宜申報

子山奏牘 卷二
憲臺裁奪自有卓見定議

張撫臺復書

前藩司詳派黃屬水手已批黃州離荆寫遠令其減
派矣但目今大兵仍已俱返荆州北岸則水手一項
似可不需親翁議以搬運軍器之夫卽爲水手之用
此議極妥當據文行藩司查議親翁仍應徑詳制軍
藩司兩處以免里民遠役之苦可也

請免運夫上張撫臺

成龍於十九日晚渡江敦請各驛店婉辭懇求無如堅執
不許憂心如焚箭委馮縣丞叩稟憲堦漢陽有驛武昌有
驢成龍將何以應卽於二十日夜至黃細問圻水縣丞王
遴自荆至彝路程運米事情荆州六十里至穿心店三十
里至河溶五十里至當陽三十里至玉泉寺四十里至連
平四十里至涼亭二十里至風寶山三十里至彝陵共三
百里山路崎嶇一夫止負米三斗帶食米一斗多負決不
能行兼有被褥雨蓋之累領米收米必需半月是一月止

可運米六斗也荆州除官僱遵法外運米一石索銀一兩六錢王縣丞離荆時一兩六錢已不肯運值有信自荆州來土人每石討價二兩五錢是運米七千五百石須費萬金以外黃屬甫定之餘災傷之際何堪當此苦累目前正餉雖完南漕正在催比轉盼明歲錢糧又行開徵民窮莫措委實難支官價六錢五分爲數雖少何至浮加數倍未必非射利之徒乘機作祟貽害百姓貽悞軍需成龍計窮力竭與士民密議蠲輸夫價以救一時之急伏乞憲臺恩憐成龍苦心俯允蠲輸恩免運夫成龍幸甚地方幸甚

請捐輸免運夫上督撫兩臺

爲請効捐輸之誠乞免運米之役以申大義以安人心事竊照我國家三十年來愛養百姓堯天舜日海內享昇平之福一旦吳賊逆天首亂湖北震驚邇來侵犯彝陵

王師會勦軍行糧食難容刻緩需夫饋餉勢所必至凡踐土食毛之氓正効力報恩之日也茲因荆民疲于奔命派夫武漢黃三府黃屬該運米七千五百石敢不竭蹶從事成龍攷古度今審其時勢權其機宜有用民之力者有用民之財者名雖殊而實則相濟惟期有裨乃公事而已如

黃屬應用財而免用力之區也黃屬九州縣以時勢言之除黃梅廣濟今夏水災題達請蠲而黃梅兵馬過往踐傷更甚已蒙司道公議裁減量派不議外麻城黃岡羅田圻水環繞崇山峻嶺接豫省之商城固始連廬州之六安英霍聯絡四十八寨素稱易與爲亂難與爲治之地去歲么魔蠢動人心叵測屢煩官兵而麻城令屈振奇黃岡令李經政圻水令蔣燦羅田令王光鼎相與戮力撲滅題敘各軍功在案黃安密邇羅山豫寇釀禍黃安令徐秉仁躬親招撫題敘紀錄在案黃陂與孝感黃安接壤逆賊搶楊店

驛馬查報題明在案黃屬之時勢如此迄今賴子以寧地方無驚然投誠向化之輩雖云革面難信革心成龍何敢一刻置諸懷則權其機宜不得不爲萬全之計也查派運米七千五百石每夫運米五斗計用夫一萬五千名呼之難猝至聚之濶可憂是夫未至荆而成龍膽先落矣奉守憲牌議運米一石應給官價銀六錢五分則七千五百石應支官價銀四千八百七十五兩是 朝廷未嘗輕役一民有此官價何處不可覓夫成龍爲軍糈計又爲地方慮情願勸勉屬民捐輸銀四千八百七十五兩爲募夫之助

少省 朝廷金錢以伸黃民急公之義以彰上憲恤下之仁用民之財寬民之力婦子仍然以寧地方仍然無驚于軍糈民生未必無裨益也如捐輸不前成龍任遲悞軍需之罪或恐成龍藉端分外苛派甘心正法以謝州縣或恐州縣藉端分外需索成龍揭報以謝士民此成龍窮極計生憂心焦悴權其機宜如此否則運夫之催逼中途之逃亾運米之遲速一日公事未竣一日憂心莫展成龍惟有愁悶絕命已耳伏乞憲臺迅勅司道各憲會議成龍寢食俱廢晝夜望賜恩命以解倒懸之危

籌報水災上張撫臺

今歲水災自四月泛漲至十月初旬尙未退涸變出異常蒙憲駕臨仙桃鎮親看水勢軫恤災黎勅藩司取各府屬被災情形繪圖請蠲誠覆載斯民鞏固邦本之至意也成龍愚昧揣度時勢竊有眇見上陳凡天下事情與勢而已官與民休戚相關如遇疾苦何忍膜置痛哭陳情職所當然若今歲之水災各屬爲民請命此今日之情也目前西南用兵日費不貲而賦稅全盛之省惟有北直浙江江南山東山西河南是 朝廷之所入有限而兵馬之需餉浩

繁且關權與鹽課俱不能征如舊額司農仰屋因之官俸
役食等項裁扣殆盡而加徵鄉宦編派屋稅無非艱難補
苴之計此今日之勢也以今日之情審今日之勢國用匱
乏災傷疊告

皇

上痛念民瘼勅

諸王大臣會議蠲免而在廷計臣必憂

心軍需輾轉無策欲蠲災則絀餉欲充餉則勸徵勢處兩
難此安徽撫憲豫審情勢有水不成災之疏而部議又有
高郵等處亦不准蠲之復也目今湖北水災最苦最慘者
無踰沔陽潛江景陵漢川黃梅廣濟而已如以被水諸縣
槩爲請命合計蠲免錢糧太多部臣必有難色倘如江南
事例則最苦最慘諸邑受害自不可言卽痛哭流涕恐難
補救或回天有力幸邀

皇

仁而司農計窘必將十六年民賦如鄉宦一例加徵是以

絀于十五年者加于十六年則蠲災之惠淺而加徵之累
更甚且蠲災不過一歲而加徵必俟事平苦若之何此
朝廷必無之事成龍籌及兵餉不得不爲之過慮也揣情
與勢之間而期於救民實際或擇被災之最苦最慘者會
請蠲災其餘仍行勸輸將國計與民生相濟爲用尙未卜

廷臣之會議何如也此成龍愚昧之見未知有合時宜否
伏乞憲鑒而慎勿效其實烈也對其災之凶吉最難
張撫臺復書
更其民生困苦又繼以水災雖河伯爲虐而地方各官尤
當加意軫恤殘黎以稍救災民於萬一耳惟親翁加
意率屬以爲此一路福星可也

聞西事報張撫臺

成龍原藉山西汾州府永寧州人西隣黃河與延安府青
澗米脂并榆林一帶相近東北與太原府交城縣接壤崇
山峻嶺此地民人祖孫父子爲盜乃逋逃之藪更甚于麻
城之東山李自成釀禍交城山中大變搶掠州境大同江
襄作亂交城山中又變攻打州城受害無盡數年頗靖然
鼠竊狗偷屢被侵欺今有客自介休來云正月內大盜謀
劫州獄聚衆搶解餉銀公然無忌四面嚮應且聞汾州營
兵提督調往平陽內地空虛人民難免驚擾成龍家口原

住城內去歲聞滇黔之變躲避鄉村九月內回城家中老
母八十四歲不知如何驚慌西北不靖又煩且朝廷一番
顧慮緣係風聞合就具稟

招募鎗手并運驢夫役復張撫臺

張漢一委牌遵諭面給仍再四勸勉竭力報恩無滋擾地
方已赴黃安縣訖於本月二十七日譚以從來黃成龍復
發委牌一張俾與張漢一協力招募又託羅山生員羅一
者亦招募不拘多寡此委羅一者便于譚以從勸募可無
他說也運米驢已有六百隻點衙役二百四十名每夫四
名領驢十隻立一小旗每夫二十名領驢五十隻立一大
旗以免混淆驢尾烙印記驢項繫懸牌書毛色并夫姓名
以便認識口袋雨具俱全均有記號又恐衙役辛苦設備

帳房委照磨李德署縣丞唐紹先督領刻日起行尙有夫
驢如法陸續前往木料委經歷張徙溟催辦合先報聞以
紓憲慮

張撫臺來書

荊州大將軍新設援勦營急需烏鎗手頃據張漢一
方茂貞二人稟稱暫委職銜彼可以各招募五百名
今將委牌二紙付去如其言果屬可信於地方無擾
則將牌給彼親翁或再給與執照倘親翁處可以召
募有人而其事於地方有碍似又不必多此一番委
募卽將原牌仍繳回可也幸酌之速速

張撫臺復書

兩接來翰夫驢一項已有成緒殊慰懸懸但委官必
須府佐方能彈壓且交米領米俱得迅速幸再酌之
其夫驢起程日期亦須卽爲速報以便檄知荆彝等
處并咨督院禁飭就近營汛拉扯耳鎗手分招極善
并復不盡

召募鎗手報張撫臺

捧讀憲諭兵夫兩事處置得宜黃屬百姓咸受憲臺無疆之福矣召募鎗手查黃安縣武生陶權錢世宗張楚耿興勃等願赴憲臺轅門効用該縣詳請蒙憲批候用調取諸生有志功名必能招致壯勇成龍星夜委武生葉方蘭前去傳諭俟到府酌議速募另報至于委官料理運糧目前照磨李德黃安典史陳聖訓分委買米驛丞唐紹先訪買粟草亦星夜調回赴憲酌委前往合先申報本月十二日巳時奉督憲牌取用獵戶浚噴黃屬各縣奉行不善仰成

龍勉諭但黃屬獵戶最少而鎗手人人可習各縣泥定獵戶二字不敢妄報以致違命此地方事宜督憲尙未熟悉之也止云武昌水師營多是黃屬召募然水師鎗手原無一名獵戶總之行師需兵上不悞軍務下不拂民情期于事各有濟督命誼不敢辭合亟報聞伏乞憲鑒

爲地方妖異報張撫臺

成龍才疎德薄久荷覆庇兼辱教誨而區區緝盜安民之私素蒙洞鑒至恩拔郡守惟覆餗是慎倍加防禦幸履任一載頗保無虞忽於去歲五月大風示警以後怪異叠見自冬迄今府城回祿屢虐兵民受困或見爲火圍或見爲赤鴉齋戒祈禱茫無一應此一異也猛虎晝行路絕人稀夜傍民舍巧爲緩步之狀故作嘔吐之聲哄人出視犬出吠則脚之而去此又一異也有一等賊民三五成羣匿於林中日將暮伺有孤客粧成猛虎一喊跳出將客挾入溪

林縛歸藏土室內不見天日遞賣他方有一等妖民青天
白日大路之上用手將行人臉上一抹其人卽不能言語
頭畜行李公然收去此又一異也至于山隅孤村有一等
惡少高郵沔陽流民人物魁梧衣服整齊口稱討米勒索
無厭稍不如意傾家搜括城市鄉村男扮女粧公然行走
沿門乞食徑入內室與婦人鬪爭全無忌憚人不知覺若
夫偷盜牛驢到處皆是成龍欲以德化之而德薄欲以法
制之而法窮將刑不勝刑盜不勝盜矣種種怪異從未經
見更可異者豫省光羅大雪盈尺卽黃岡境內雨雪潤濕
而麻城黃安自秋徂冬全無雨雪土堅成塊犁不能入麥
未下種野無青菜固成龍不肖所致亦是造化菀枯不齊
目前開徵不知何狀茲當新正履端之始乃憲臺百福駢
臻之會正千官慶賀之辰亦卽萬姓望澤之期成龍備敘
黃屬情形仰冀憲鑒俯賜軫恤以垂弘庥

請禁健訟條議

查看得楚黃健訟從來久矣而安邑刁風於今爲烈該縣請嚴主唆越訴等事之詳是必積鬱憤懣疾牢不可破之陋習仰冀肅清奸宄之嚴威細繹詳內辭意實有所指難逃洞鑒蒙批成龍嚴查遵卽行縣據實敷陳去後該縣復稱仰體兩部院使民無訟之心謬抒愚衷以期小補原非有所指等情申覆前來成龍據文轉報若不確議具詳則草率之咎奚辭業奉憲臺斧鉞之嚴申飭玩忽之罪成龍又何敢疎畧如前而不爲憲臺備陳之湖北地方自十

三年風鶴之後水旱頻仍兼以湖南未復憲臺爲封疆大
臣日夜焦勞凡屬僚仰遵憲飭防奸察僞以救寧地方爲
急務且用兵日久荆岳軍供有司拮据不遑去歲洪水爲
災疚心倍甚無如黃屬奸棍幸免兵馬之擾如江右之慘
不念

皇上憫恤之弘仁不惜有司保全之辛苦不畏連年天災之
疊見專以起滅詞訟爲長技魚肉良善爲兒戲破人家產
爲得志誣讒紳衿富室爲威風安邑貧瘠民雖好訟可無
大傷而麻城黃岡圻州之刁風實爲可異一夥奸棍呼朋

引類搖唇鼓舌人人自危成龍再四勸諭以主法可欺鬼
神決不可欺將來男盜女娼滅門絕戶之報毫不可爽而
惡等恬不知怪夫使民無訟古帝尤難之成龍德涼才薄
豈能易俗于一旦亦付之無可如何而已該縣之詳傷時
憫俗實非無意而無所指一語乃遁辭也不得已也成龍
又何敢忖度他人之心而懸擬之憲檄下飭將州縣已經
審結之案准於解文備敘詳奪有無煩瀆是否可行誠憲
臺審酌上下之情欲以嚴禁小民之刁訟又欲大破有司
之賄庇甚費盛心也如民間詞訟止許有司准理而禁止

越訴惟恐勢豪紳衿積年衙蠹一手把定有司受賄徇情亦未可定或執一偏之見或多疎畧之失以致民冤莫伸上干天和是許民上控以清積弊誠不可緩也辨理軍民冤枉國法具存既經上讞自有公斷則州縣審結之案似不必於詳文備悉恐開文飾到底之病又滋往返駁究之煩但州縣爲發跡之始有未控州縣而徑赴上控者有原告在州縣而被犯徑赴上控者有原被俱控州縣未經審斷而急赴上控者一事而衙門告遍種種不一成龍曾有禁訟條約如州縣不准民詞或已准塌案不審許赴府控告務於狀內開明州縣不准塌案不審年月情由如本府不准民詞或已准塌案不審應赴上控訴務於狀內開明告府不准塌案不審年月情由將府州縣以不職叅寃如州縣已經審理或受賄徇情或執拘疎畧不恤民隱許赴府申寃務於狀內粘連州縣審語如本府已經審理或受賄徇情或執拘疎畧不恤民隱應赴上申寃務於狀內粘連本府審語果有不法等弊分別輕重輕者記過重者叅革寃擬如審察民情真僞之中寓甄別州縣優劣之意於以禁刁訟而嚴官方此成龍一片苦心已通行各屬張掛

曉諭而奸棍藐不遵依黃民無良傷天害理莫此爲甚成龍因事涉瑣屑當軍務倥偬之日憲臺寢食不安之時不敢煩瀆止自愧德薄化淺引罪負愆而已成龍更有下情痛切陳之小民之訟也非盡原告之失也止因稍有口角在傍訟棍陡起風波挺身代告書名作証卽原告亦不能自主之也且牽告無辜或以洩宿忿或以食弱肉及至提審彼飛颺遠遁脫身事外致原被兩敗俱傷此代告之害深可痛恨也嗣後原告上控卽發江夏縣押歇家解本犯回藉查實取收管回報另行起解候審則代告之弊或可少除矣又有一等光棍聚集會省出入衙門開張客店專以包攬詞訟爲生涯或有愚民一時小忿投入羅網便成驚天動地之詞一黨奸棍塞滿村墟止寄一原被佐証姓名訟事從天而降儼然居停禍福在其掌握此包攬之害深可痛恨也嗣後申飭江夏縣挨門嚴查凡麻城黃安等處刁棍在省會者無論久住暫住押解回籍取本地方官收管存案仍力行保甲諭民本分生理禁止出入衙門則包攬之弊或可少清矣又有一等訟師凡告訴不准之詞一經毒手無不聳准如成龍奉批上行事件或有以圻州

而冒稱武衛者或有以武昌而冒稱黃屬者此猶其小者
也有以田土之事而捏稱夥兵活殺者有以口角之微而
捏稱殺傷人命者誣之以不得不准之詞及至質審不曰
代書張大其詞已不知情則曰事不告大不得上准不曰
無謊不成詞則曰路遇人誤寫加以反坐哀號乞命是原
被証佐之家盡淪喪於訟師之筆端此代書之害深可痛
恨也嗣後准理詞訟先考定代書分衙門伺候無得攙越
有代書圖記者准理臨審情與事違者代書依律究治仍
將原犯罪狀坐於代書名下則代書之弊或可少止矣再
飭州縣仿木皂隸之法凡遇准理詞訟差木皂隸遞送鄉
保知會依限赴審如過期不至或失落沉閣先加欺公之
罪後定原被之案若夫本府奉上批詞州縣解到人犯三
日內不審或已審之後十日內不招詳報上者成龍甘認
曠職之罪州縣遠近不同近者以半月爲期遠者以二十
日爲期如過期不解成龍卽行報明繩州縣以曠職之罪
或各犯居住星散難以依限申解亦應州縣詳明轉請展
限仍按期結案庶幾府州縣勵精圖治民寃無抑可省上
憲清問之勞從此訟獄衰息風俗雍睦時和年豐家給人

足于以輸正賦供軍需綽綽乎有餘裕矣何患乎南寇之不蕩平楚疆之不底定哉緣奉批飭確議事理成龍不揣愚瞽不識忌諱冒昧上陳冗繁過多未知有裨清訟與否

籌廢藩及江淤地畝認糧議

清查田畝一案關係國計民生旣防欺隱又免包賠誠於目前籌餉之中爲久遠善後之圖煌煌

天語培養根本積累功德豈微識淺謀所可幾及也成龍自奉清丈之檄查算黃屬田畝咸遵部頒全書起科原無缺額可省行丈滋擾厲民惟爲國用計止有衛所地畝荒熟未清江湖崩淤小民爭訟請丈認課至於廢藩宅基園塘原無錢糧不在更名地畝之內曾條陳藩憲酌詳以清丈理頭緒總期不病國不病民爲籌餉涓滴之一助也成

龍淮圻衛請丈出首蘆地報明前往而該衛已經查確出具印結申報毋容再丈因見圻城滿目荒草居屋晨星查係故明荆府諸王宗室廢基麒麟山下荆府正宮建立佛殿東宮建立關夫子廟四傍營兵蓋屋居住蒼鷄山前德安府爲已故王叅將修屋家眷居住東城應山府爲現在李鄉紳領修街房鳳凰山底永福府已開爲菜園有庠生願領爲學堂一時人心鼓動爭認價求領有十數兩者有二三十兩者有四五兩者合算有七百餘金而懇領尙未止息查更各地畝一案係載正賦錢糧在圻州全書額

內比時苦於承墾無人正賦缺額變價之說格格難行何暇議及廢基荒園也田地招人開墾納糧尙且難之城內之荒基招人建屋居住將誰應乎 國家三十餘年地方享承平之福雖數載寇氛密邇而人心鞏固咸爲子孫之計願上價承業已建屋者無官基虛懸之慮甫認領者有創造日新之漸合乎人情似屬可行若編入更名地畝恐人心退避蓋以地畝每年耕種納糧與屋基修葺居住之不同也但變價之說恐開後釁或易變價之名爲上價領開廢基修屋居住以實城內之煙戶以壯金湯之氣邑未

知可否伏候憲裁若夫淤地臨江舖與洲民相爭松楊舖與屯軍相爭屢懇丈立界限又羅湖洲李家嶺首報新淤三十五頃成龍親赴鴨蛋洲踏看除久淤已種熟者將新報之弓口畝數與老冊對查內有溢額照畝認納蘆課此無容議惟相爭者之地界尙在盈盈一水中先將竹纜量定丈數兩家攜舡水面插竹水底各立界限成龍均平分之鴨蛋洲量定四十九弓臨江舖自認一百三十二弓此地江流在上金草塌白沙之無跡不知相爭之意爲何也成龍細加採訪據洲民崔雲從稱臨江舖界內占去伊今年麥地蓋以九十月之交水涸地出種麥至來年三四月間收麥任江水湧流如此之地似可免議留百姓以有餘無如各願認課永爲已業祈免後來之葛藤松楊舖與屯地亦同此類至羅湖洲李家嶺據報三十五頃又報一十五頃係互控黃岡縣憑衆處明立約今丈明願承蘆課但西江之水雖淤而東江之水已崩似非永業將來包賠之苦在所不免但不認課而承業者終不安心旁觀者難禁指摘成龍仰體德意凡一切已崩者可否將新淤補還准賜印照以杜衆議庶可免賠已崩之糧而又認新淤之課

也又有葉家洲係大江流水溢入有淤無崩似可承課又查蘆政淤地五年一丈自康熙二年丈後迄今十有餘年值茲奉行丈定似可免將來部差之煩又有陽邏等處湖澮清水曰湖止水曰汊載蔴鐵乾魚正供長江流水業甲納府鈔正供江水崩淤不常凡有新淤水澮應歸長江業甲無如湖課業甲與兩岸居民每多私占取魚亦爭請丈且有舉首隱沒湖璫淤地成龍因案牘積久回府料理伏乞憲裁可否併查如奉文查出田畝多寡有紀錄加級卽陞之例誠以鼓舞効力之法雖清查爲州縣職所當然但成龍在圻在洲目覩州縣在烈日之中步行查丈揮汗如雨面顏頰黑爲國盡心不憚勞瘁紀錄加級卽陞固屬庸之恩典然或邀一時之功名貽日後官民之苦累此成龍之本心所不安也又廣濟民首出王庄未知虛實可否行查首虛反坐合併敘明統乞憲裁或勅藩憲酌議萬全杜百姓之物議免大部之瘕索賜示以便遵行

張撫臺復書

清查田地事關國計民生固不可任民欺隱以虧惟正之供亦不可聽有司邀功以滋異日包賠之害然

必求其實使上下均受其益圻州清出廢藩宅基地
如堪載賦者宜於更名田地內清出陞科昨接親翁
之詳已批藩司查議矣至於公議價值之說查昔年
更名田畝曾有變價之部行後因民累不堪遂爾中
止今應作何舉行閱稟未晰幸再爲備復可耳

接長沙捷音賀張撫臺

蒙憲露布恢復長沙成龍遵卽張掛通衢曉諭士民仍抄
錄遍傳以見用兵三年有此奇捷從此兵威大振南寇死
解衡寶一帶勢如破竹乘勝長驅直擣桂林以壯粵東之
氣以牽滇黔之臂陝閩膽落平靖妖氛在此一舉是誠
朝廷洪福憲臺可漸紓宵旰之勞也成龍捧示不覺雀躍
異常湖北地方可望甦息成龍年邁力竭庶敢泣請告休
沾憲臺破格之恩與太平草木同享無事之休矣

出意重物終必厚其本不草木同享無事之功矣

惠澤亦出於此可也無息以謂年終代以漁獵於

時也其謝禮也何多矣

亦以事地也其謝禮也何多矣

亦以事地也其謝禮也何多矣

亦以事地也其謝禮也何多矣

亦以事地也其謝禮也何多矣

復張撫臺

成龍庸質腐材蒙恩提拔惟期盡職圖報守巡之任自揣
難勝部議適如素志偷安一隅稍藉藏拙且各屬英齡質
美性善儘可教訓黃屬健訟漸加約束俾就繩墨課農桑
廣積儲少紓憲臺東北之顧以酬弘恩於萬一此外不敢
有過望也惟恨年邁神疲力不從心耳蒙頒銀五百兩採
買米石粟草遵卽備辦候命運解外具領狀一紙伏乞憲

鑒

張撫臺來書

署中食指繁多茲者新稼將登之際特附去銀五百兩煩親翁陸續照市價買備米石買就之日幸以見聞當發船來裝運也瑣事屢煩蓋恐托之他人則又有滋民間之累耳端佈不一

重選鄉約示

爲重慎鄉約以端風化以靖地方事照得 朝廷設立鄉約慎選年高有德給以冠帶待以禮貌每鄉置鄉約所亭屋朔望宣讀六訓勸人爲善去惡甚盛典也後世查奸戢暴出入守望保甲之法更多倚賴焉無如黃屬風俗澆漓教化陵彝凡有司勾攝人犯差役不問原被告居址輒至鄉約之家管待酒飯稍不如意詬詈立至且於朔望點卯之日肆行凌虐倘人犯未獲卽帶鄉約回話是差役之嚇詐鄉約倍甚於原被二犯更有苦者人命盜賊不離鄉約

牽連拖累夾責受害甚之詞訟小事必指鄉約爲佐証投到聽審與犯人何異且一事未結復興一事終朝候訊遷延時日無歸家之期離縣近者猶可早來暮去三家店等處遠在縣治百里之外卽以點卯論兩日到縣一日點卯再兩日歸家是半月內在家不過十日加以協拿人犯清理區保手忙足亂無一寧晷若三家店丘鄉約買一婢女止應得鄉約一年民間那有許多婢女以供因公賠累乎凡爲鄉約者所宜痛哭流涕也言之可爲太息當日給冠帶待禮貌之優典何在宣讀六訓查奸戢暴之良法何在一旦責成保甲彼鄉約曾未家居何由而勸人爲善去惡何由而諭人出入守望名實不符上下相蒙世道頹靡大不堪言因之年高有德鄙爲奴隸殷實富家視爲畏途或情或賄百計營脫而寡廉喪耻之窮棍兜攬充役串通衙捕漁肉煙民以編甲漏造爲生意以投呈証佐爲活計惟恐地方之不多事也居民之不興訟也差役之不來照顧官府之不來呼喚也事勢至此尙可言乎故報之鄉約巡檢有常規差役有常規書辦有常規此等銀兩非出之煙戶而何鄉約之苦至此極矣於是有半月之鄉約一月之

鄉約有朋應幫貼之鄉約真如問徒擬軍求脫離而不可
得更有良心喪盡之輩報一名賣一名臨時必用陪點上
下交接又有頂首積弊錮習不可救藥欲端風化靖地方
宛如癡人說夢茲奉上臺嚴檄力行保甲本府仰體德意
痛革前弊合行曉諭爲此示諭地方人等知悉自示之後
有司隨查明鄉分於適中之地立鄉約所亭屋選年高有
德者擇吉迎送給以衣頂行二跪一揖禮在鄉約所任事
朔望諭鄉民聽宣六訓此外一不許票仰協拘人犯二不
許差役到家飯食三不許原被告指爲証佐四不許朔望
點卯五不許請立印簿六不許差督編查煙甲七不許買
辦軍需八不許人命盜案牽連姓名九不許投遞報呈十
不許紳衿把持凡人命盜案勾攝人犯惟保甲保長地方
是問惟爾鄉約無事則勸化愚民有事則密稟自封用圖
記牢釘星夜飛遞一年更換地方平靖訟獄不興者年終
給以稱職字匾地方多盜訟獄繁興者年終書不稱職用
木刻條釘於門首或歛錢擾害不公不法者訪實卽時懲
革於縣前懸大木牌書貪惡鄉約姓名於上以示勸懲於
以端風化靖地方庶幾近之矣凡我屬邑勉力行之以宣

揚上憲德意未必於地方風俗無裨益也

華公烈前思大本職書負惡職辭致不於士以不

木改科除放門首死於焚焚書不公不於首而

命以無無半則此大之益益於學與行不於

所半自是亦非部一平更於此大平也

長開則則則則則則則則則則則則則則則則

不指則則則則則則則則則則則則則則則

不指則則則則則則則則則則則則則則則

不指則則則則則則則則則則則則則則則

禁士人充里役示

為禁止生員充當里役以端士習事照得 國家設立學

校考取民間俊秀子弟優免差役以示作養之意誠盛典

也故上自縉紳下及編氓之家凡有子弟延師教授罔不

冀一青其衿雖前程遠大此其階梯而養尊處優實不等

於齊民即武途與文學并重 朝廷原無異視無如楚風

不古黃屬文武生員訪有充當里役奔走衙門恬不知怪

日與隸卒為伍者不思 國家優免之謂何鬻官臥碑之

謂何豈盡有司失隆重之禮抑亦諸生甘自踏秦士之賤

也合行嚴禁爲此示諭所屬文武生員知悉自示之後務
宜各愛體統自重名器如生員名下糧石數多另立名色
親身上納不許催收甲戶錢糧或云戶口消乏豈果無一
二人丁可應里役何苦自賤至此如必欲包收應役該州
縣將應役生員姓名查對紅案別釘一簿直書學名申繳
本府以憑轉報學憲查核法在必行該州縣勿得隱諱猫
鼠同眠以致士風愈下此本府一片熱腸慎毋有違

勸賑諭帖

今歲饑荒太甚窮民畏法甘心餓死罔敢爲非凡我上庶
孰無惻隱之心本廳已倡輸化緣晝夜憂思自己力薄不
能溥施又恐募化錢穀難於周給有一法於此饑民咸有
戶族仰戶長稽查合族化米贍養如無戶族責在甲長稽
查報知鄉保與練長會議計區內饑民之多寡合一區烟
民布施搭救上戶節省酒肉中戶減少飲食集日用口腹
之餘瀝救戶族隣佑之死亾鬼神有知必報以戶族興盛
隣佑和睦施多者子孫富貴施少者家門平安或饑民繁

多竭區內之施化力不能給卽據實報明公議設法官助
如區內戶長甲長坐視饑餓不報知族尊鄉保練長以致
饑民餓死者戶長甲長照見死不救科罪鄉保練長力不
能繼忍心不報官者各倍罰賑此以族中之布施養族中
之饑衆區內之布施救區內之饑衆易爲照管法似省便
且以官賑備其不足或可野無餓殍和氣召祥豐稔可俟
將此立斃之殘生得見來秋之大有不惟施救者欣同樂
利而更生者不知如何頂戴也此法出自苦心思惟凡我
士庶勉強而力行之不勝引領以望

申明六訓示

爲申明六訓以靖地方事照得保甲之設稽查奸宄而出
入相友守望相助親睦之風於斯備焉此六諭 聖訓掌
之鄉約所以倡明禮教潛消黠悍之氣家庭之間父慈子
孝兄友弟恭鄉黨之中尊敬長上見官府則尊敬見鄉紳
則尊敬見耆老則尊敬不敢以下犯上不敢以賤妨貴不
敢以卑欺長從此而人心端正風俗淳良和睦教訓務生
理無非爲釀成和平之福盜賊不生奸僞不作末世視六
訓爲虛文人心日變風俗日媮盜賊奸僞日生職此之由

合行申明爲此示諭鄉民人等知悉嗣後務遵六訓實意
力行父以之教子兄以之教弟若犯不孝順不尊敬等事
鄉約呈報按律究處是又保甲之根本也切勿仍視爲故
事

籌黃安饑民示

爲曉諭事照得黃安饑荒較他屬尤慘本府雖以軍需繁
劇晝夜焦勞未嘗一刻少怠至府之日業將九屬情形痛
切呈詳請蠲請賑已蒙撫部院知照彙題在案其未完
槽斲什物等項一槩免解新派草束發餉銀代買我民自
可安心受窮但所種禾稻有不獲顆粒者八月秋中荒村
男婦尙不得一飽若至十月之交雨雪載塗其何以堪今
計九月天氣猶暖爾民尙可竭力支持及至隆冬必致饑
寒不能出戶凡老山羊角石灰等處有真正孤寡貧窮朝

不保暮者本戶量爲周濟倘本戶貧乏不能周濟鄉保設法賑救若鄉保貧乏不能賑救報官設法若戶首鄉保坐視其死隱忍不報查出定償命不饒仰生員某等逐戶細查饑民緩急確冊彙報以便本府設法量給升斗苟延時日本府先借銀一百兩買穀積貯俟買完報數本府親臨給散以救須與餘俟勸輸全賑爾百姓各宜安分俟命決不使我民餓死特諭

團練保甲示

爲再行申飭保甲以全生命事照得編查保甲團練鄉勇之法無事則稽察盜賊以遏亂萌有事則相機救援防禦堵勦不動支糧餉而兵足不調撥官兵而賊除兵農合爲一家戰守不分兩局自古及今消弭奸逆安靖封疆未有善於此者也若不揣事勢者以修立垣保遂爲聚衆見製造器械輒云謀叛不知爲逆之人聚匿深山大澤何常有定之垣堡私造利戟長矛幾曾畏有司之禁約惟善士良民守分奉法堡無完牆家無寸鐵倏忽之間死賊突至

赤手空拳東投西竄賊能縱恣殘民民無所恃拒賊妻子
爲擄牛種爲掠骨肉分離室如懸磬歸怨於上相率爲賊
田地日荒糧稅日減其何以培國脉固根本耶本府前奉
督撫司道編查麻城三鄉區保甲冊籍委用堡長垣主分
派戶首烟甲嚴取隣居互結責以守堡禁夜總期地方盜
息民安向化樂業正寓兵於農以人治人之微意也乃好
事奸宄懼此法一行彼無所匿從中造捏訛言妄稱抽丁
恐嚇愚昧見保長編冊疑惑橫生或不遵稽察或隱漏戶
口殊可駭歎當此 禁旅如雲所向克捷各省客兵尙多
閒置何須爾等村農荷鋤充伍卽使果欲抽丁莫非王
土莫非吾民 功令孰敢不遵奚必先假編查然後按冊
索取乎且爾等疑保甲爲抽丁隱匿不肯入冊小而言之
漏戶有抗法之罪大而言之觀望有闔門之誅試看東山
逆地屍橫遍野血流成渠是保甲抽丁而死者歟抑從賊
作逆而死歟編保甲出鄉勇者未損一人不編保甲妄想
富貴者死已千百保甲無害於人從逆無利於己固自彰
明較著柰何勸爾爲善便自千難萬難未嘗驅爾爲逆竟
若神牽鬼使何愚於爲惡而不智於爲善乎本府憐爾等

癡頑再申儆戒宜乘此閒暇修築垣堡各備器械以資防禦爾堡長垣主戶首鄉保烟甲人等宜自愛重慎勿驚疑果能妄念不生非事不作士爲善士民爲良民本府待爲腹心州縣隆以優禮橫逆不至刑罰不加何等安逸尊榮較何士榮等妄想富貴而家破身亾者豈止天淵隔哉本府更有勸諭被賊煽惑入夥者宜作速投見改過遷善卽爲好人若潛伏草澤爲人捕得自送性命爾堡長垣主當以招徠爲念切莫乘機挾財悞命從來不義富貴都是禍根孽緣能於此中分明便是希聖希賢心地思之慎之

慰諭急公示

爲曉諭事照得滇黔作亂大兵征勦鍋槽草豆勢所必需非官司之忍心苛求實兵馬之日費浩繁爾民遠處山谷辦解固苦而各官軍前支放淒楚尤甚本府在武昌答應因草不足曾撞頭於柱上因豆不足曾逼跳於江中因舡不足曾捨命於湖內傷哉九死一生言之涕泗交流是屢次派徵爾民有賣兒鬻女之慘而催解不前居官有性命存亾之危卽撫部院 朝廷大臣身受窘辱大小官員奔走泥塗實厄運偶逢三桂造孽害我官民夫誰怨尤在

朝廷軫念民艱一應軍需現發帑銀尤恐下情難達特委
三大臣料理糧糗決不派之民間浩浩

皇恩諭告屢頒且撫院告示有軍需孔亟念切如傷請銷脚
價請緩征賦宵旦不遑形神交瘁之語昭然在人耳目爾
民閱之豈不痛哭無如上恩有餘而下行則阻如買草
每束一分二厘未嘗短價而發銀未能足數因零星發買
必有折損差役鄉約俱有盤費此項銀兩豈非一分二厘
內數乎若夫軍前折草官價一分二厘如數支給查每旗
有三營每營甲喇四五名共有十四甲喇不等卽分銀十
四封傷折最苦且五日一放無限留難又八旗有八委官
支持每放有賞賜哀哉此分外費用不准開銷責之官賠
窮官有何家業而能賠耶爾民之苦官知之居官之苦爾
民何能知之若夫武昌之草費至二分荊州之草費至三
分以外哀哉官民交病誰好爲之如催解嚴切爾民知爾
民之苦本府署武昌因安撫來麻時衙中尙有總督令箭
供奉棹上差官夜不收坐則衆喧嚷行則拉馬頭居官如
此之苦而欲州縣之緩催得乎所幸者禾苗豐盛天恩也
錢糧停徵

皇恩也黃屬地處江北雖有兵馬往來不過一時之驚比之
荆襄鄖岳武漢一帶大兵駐扎野無青草糞積如山民人
流離不知何所則黃屬尤徼天幸享大平也合行曉諭爲
此示仰黃屬民人知悉軍前需用勉力支持且照糧派解
尤屬衆擎易舉總受追逼皆由天定切勿怨尤難星無不
過之日逆孽有速平之機照項蠲補以酬勞費特諭

禁諭荒民示

爲曉諭事照得六月旱災已極七月以來連日下雨東山
一帶其雨已足竟稱豐稔岐宋之間亦屬大有唯西北一
帶雨雖不足而陰雲四起已非無雨之象近聞西北等處
人心洶洶或向有穀之家封倉閉糶不但理法不容亦見
人心昏昧時維七月尙未交秋日下有雨仍屬豐年卽令
無雨種麥種菜尙望有秋若秋後無雨田禾盡稿十冬之
交爾百姓一面竭力支持諸有司自當設法賑濟未有豐
凶未定自蹈法網先干不測者也除已往不究外合行禁

諭士民人等各安分業毋得妄爲倘有不法許區長指名
首報以憑究處慎勿死於法而得生於饑則幸矣

招募反側充伍示

爲禁約事照得東山逆黨一歲三叛繩以國法當大肆
殺戮盡絕根株本府仰體各憲好生德意念爾愚民無知
爲奸宄煽惑以致發兵剿絕身首異處妻子家業一旦成
空真可憾又可憐也除將首逆擒解正法外餘黨概行免
死但爾等共圖不軌釀禍地方凡被害之家何能甘心隱
忍爾等餘黨中懷疑畏莫若乘召募鎗手之名投見本府
充兵食糧如有技勇另加提拔先給安家銀一兩五錢隨
帶鳥鎗照例領價與其提心吊膽不如披甲荷戈爲此示

仰東山一帶士民人等知悉凡有願充招募速行報名決不相強至若地方士民與衙蠹惡捕假稱兵役肆行嚇詐毒害無辜者本府已訪知一二件仰受害人等作速申冤立刻通詳拿究勿謂城狐社鼠本府生性執拗決不假借總使勢不兩立亦自無妨也特示

慰諭黃安饑民示

為曉諭事照得黃麻東山一案本府已經撫勦事竣各村堡安輯如故近因府屬災荒惟黃安最甚本府念切民艱業已具詳請蠲請賑蒙撫部院彙題在案又目今槽斲草米等項本府一一代為備辦解訖爾民既免軍需可以安枕又思爾民饑荒除出示勸諭鄉保戶首設法賑救外本府隨借銀兩買備穀石俟隆冬給發斷不令爾等餓死我民可以放心無憂近聞光羅交界一帶間有竊發或迫於饑寒或迫於催科或窘於軍需種種苦情皆未可知我

民患切震隣合行出示曉諭爲此示仰黃安連界士民知悉
接彼情形速相勸諭令彼悉將苦情具詞本府以憑詳
院移咨豫撫體情撫綏轉危爲安倘彼不悟爾等宜自爲
身家計并體本府苦心督率鄉勇嚴爲堵禦以分涇渭定
將有功士民詳請獎賞目前大兵經過恐動聽聞乘便撲
滅噬臍莫及思之慎之毋忽

委黃安士民堵禦牌

爲委任堵禦以保良善以靖地方事照得黃麻東山一案
本府撫綏已竣 題敘在案近因府屬災荒黃安最甚本
府念切民艱一應軍需代爲備辦解訖又思爾民饑荒設
法賑救茲聞光羅一帶間有蠢動恐致震隣合行特委防
禦爲此牌委某照牌事理凡屬村堡務期編立保甲清查
匪類勸諭隣封嚴守本境倘彼猖獗侵犯一面飛報本府
一面督率鄉勇堵勦務使外寧內謐定行詳請獎賞爾等
亦不得藉端生擾未便

慰諭陽邏士民示

為再行曉諭以安人心以靖地方事照得地方之不靖由於人心之未安人心之未安由於疑畏之未釋陳鼎業父子家世陽邏同鎮士民非親即友偽劄一案或有附和入黨者或有知情觀望者或有畏禍結舌者鼎業事露人人自危誠無足怪本府確知爾等隱情槩不株連於去歲十二月內親臨爾鎮發示勸諭爾民之心可以安矣春三月間爾民復驚畏不安或見不軌之徒潛布流言今史國柱等已經授首則爾民之心可以無驚或又見陳玉之久禁

首犯未除恐其波及今陳玉之等已正法則爾民之心更
可以安又或見陳鼎業陶雪白等未獲遍行緝拏致生疑
畏不知已逃必捕者 朝廷之大法也來歸必釋者 朝
廷之大恩也卽張漢一方茂貞投誠有功撫部院賞賜袍
帽銀兩現今錄用已有明驗若陳鼎業陶雪白等洗心改
過親自投誠不但不究前非亦且嘉與維新倘執迷不悟
定期必獲此理勢之必然與爾民何干多此一番疑畏合
行出示爲此示仰本鎮諸邑人等知悉凡倡亂者許自投
誠卽行獎賞親戚隣佑槩不株連有私行詐害者許被害
之家不時喊稟便行究治各宜安心樂業毋貽自戚

招撫委牌

爲招撫事照得逆賊孫調元史國柱陳鼎業等攜帶偽劄
煽惑內地漸次就擒梟首示衆尙有脅從某等疑畏未釋
踪跡靡定棄家失業深屬可憫合行招撫爲此牌仰某等
前往密探如得某實在踪跡卽便開誠勸諭務釋疑畏傾
心歸正回家樂業勿使流離失所本府素性正直從不欺
詐陷人傷天害理以愚民性命爲貪名邀榮之事爾等切
勿仍懷反側自取棄家失業之慘爾奉差人等亦不得藉

山奏牘 卷二
瑞生事有干法紀

禁夜行示

爲曉諭事照得天井山附近一帶盜賊夜行婦女不安鷄
犬不寧皆由防守疎虞以致鼠竊狗偷於本月初三日據
丁生員報稱夜晚把守隘口要路有賊八人夜行被伏路
鄉民陳欽明等烏鎗打死二人獻首級前來賞銀四兩紅
三疋錢三百文合行曉諭爲此示仰各區長人等知悉嗣
後各撥鄉民把守隘口要路如遇此等夜行鼠賊照例打
死獻功請賞萬勿疎忽

于山奏牘卷之二 終

